

# *SHÀLOM*

Disangisha, disangisha dyànyì dyà cidimu cipyacipyà mutùcidì ànu tubangilakù cyanàànà. Aka ki kàanyì kampanyè kàà kumpàlampala menemene kàà kacya cidimu cipyacipyà cyàtwadija. Kaa, mvwa mwenze ndambu wa malòòlò kumbelu, pashiìshe kupweka ku Fort Huachuca aku. Ki munùtù bafwànyine kucishindumuna nànku mpindyewu anyi? Ncyêna mmònà munùdì nufunda *Huachuca* nubanga ne dileeta dyà *H* to. [Katùpa kàà mukàbà wà mèyì munda mutupù—Muf.]

<sup>2</sup> Katùtu, katwàkwikala ne cilumbu cyà lumwènù lwà cìmònànyìmà to. Lumwènù lwà cìmònànyìmà lùtu ànu lutangila paanyimà ne lumònà mwaba ûvwà awu. Twétù tudi tutangila kumpàla bwà kumònà kutùyààya, nwamònù's. Aci ncidi mu matùkù à kale, Pôlò wàkamba ne: "Mpàà mwoyi bintu bìdì bimane kupita abi, Ndi ngambuluja mutangile ku kiipacìlà kàà dibikila ditumbuke mu Kilistò." Nènku ki citùdì baswe kwenza ncyôcì aci. Muntu, tudi mwà kwela mèsu paanyimà kùkaadi bidimu dikumi ne bitaanu, anyi dikumi ne bisambòmbò, pângààkalwà mu Phoenix musangu wà kumpàla, kudi bintu byàbûngì byenzeke kubangila ànu piine apu, bîmpè ne bibì, byônsò biyaya ku Cilumbulwidi, mu byanza byà Nzambì. Kàdi cîndì ndumbila mpindyewu ncîngììkala mwà kwenza mu cidimu cilwàlwà eci, bwà kutancisha Bukalenge, kwenza bitambidile, byônsò bîndì mwà kwenza bwà Bukalenge bwà Nzambì abi.

<sup>3</sup> Mpindyewu, mu mapingaja emu ndi muswe kutwala Diyiisha dyà cidimu cipyacipyà edi kùdì Èkèleelziyà udi mu Kilistò, ne pashiìshe mààlabà dildòòlò netùbangè kusambilila babèèdì. Nènku netwàbanyè twarta twà disambila pankaci pàà... Ngeela meeji ne disangisha didi dibanga pa dîbà mwandamatekète, dîbà mwandamatekète ne tusunsa makumi àsàtù, mbîmpè kwikala mwab'ewu pa dîbà isambòmbò anyi dîbà isambòmbò ne tusunsa dikumi ne tùtaanu, dîbà adi, bwà kupeta twarta twènù twà disambila, apu kanwàkutacisha citupa cikwabo cyà disangisha nànsha.

<sup>4</sup> Tudi baswè kusàkidila mu—mutangidi wa kaaba aka, wa Ramada ewu, bwà mudiye mutwanyishile bwà kupeta citanda eci bwà masangisha aa, kumpàla kwà mpungilu ewu. Mukalenge amubènèshè.

<sup>5</sup> Nènku mpindyewu panwìkalà baswè kubuulula mu Mifùndu, mwaba wutùdì baswè kubala, Nêmbarè mu Yeshààyì, nshapìta wa 60, ku mvensà mwi—mwi2, wa 1 ne mwi2. Ne Misambu 62:1-8. Misambu 62:1-8, dyàmbedi.

*Bulelèlà musùùkà wànyì mmwindile Nzambì: kùdîye nkùdì kufumina lwànyì lupandu.*

*Ànu yéyè ki lubwebwe lwànyì ne lupandù lwànyì; yéyè ngudi ngabu wanyì; ncyakunyungishiibwaku bikole to.*

*Too ne cikondo kaayi cinwàtungùnukà ne kungelela meeji à macimbu? nwènù bônsò nenushipiibwè: nenwikàle bu cimanu cyàmba kuupuka, bu lupangu lwàmba kubumbuka.*

*Mbaye ku citungu ànu bwà kutonkola pansi, bwà kumutonkola pa mwaba wèndè mutumbuke awu: bâdi basankila mu mashimi: bâdi babèneshila ku mishiku, kâdi mu mwoyi beela milawu. Diikisha.*

*Musùnkà wànyì, wèwè eyémèna ànu Nzambi; bwalu dyànyì ditekemena dìdi difumina kùdîye.*

*Ànu yéyè ke lubwebwe lwànyì ne lwànyì lupàndu: yéyè ngudi ngabu wanyì; mêmè ncyakunyungishiibwaku to.*

*Mu Nzambi ki mùdì lupàndu lwànyì ne butumbi bwànyì: lubwebwe lwà dikàndà dyànyì, . . . cisokomenu cyànyì, cidi mu Nzambi.*

*Mweyemenaayi dibà dyônsò; nwènù cisàmbà, pòngololàyi myoyi yènù kumpàla kwèndè: Nzambi ùdi bwètù cisokomenu. Dikiisha.*

<sup>6</sup> Ndi munange mùshindù udi Davìdì ùcyàmba ne: “lubwebwe.” Nudi numònà’s, misangù bûngiyì ne: “Nzambi ùdi lubwebwe lwànyì.” Nudi bamanyè cidi lubwebwe luumvwija, mu Bible anyi? *Lubwebwe lùdi* “dibuulula.”

<sup>7</sup> Mwàkambà Peetèlo ne: “Wèwè udi Kilistò, Mwânà wa Nzambi udi ne mwoyi.”

<sup>8</sup> Yéyè ne: “Udi mubènèshìibwè, Simona, mwânà wa Yona. Ne pa lubwebwe elu, dibuulula edi. . .” Nzambi wàkamubuulwilaci. “Ki mmusunya ne mashi bìdì bikubuulwile eci to, kâdi Taatù Wanyì udi mu Dyulu. Pa lubwebwe elu, dibuulula edi, Nêngiìbakilèpu Èkèleeyìà Wanyì.”

<sup>9</sup> Ne Davìdì nyéyè ewu wela lubila ne: “Nzambi ùdi lubwebwe lwànyì, dibuulula dyànyì!”

<sup>10</sup> Mpindyewu mu nshapità wa 60 wa Yeshààyì, ku mvensa wa 1 ne mwi2.

*Juuka pansi, kenka; bwalu bukénkè bwebe mbulwe, ne butumbi bwà MUKALENGE mbubììshiibwe pambidi pèèbè.*

*Bwalu, mona, . . . mîdimà neyìbwikile buloba, ne mîdima yà mupimbu neyìbwikile cisàmbà, kâdi MUKALENGE neájuukile pa wèwè, ne butumbi bwèndè nebùmwènekelè pambidi pèèbè.*

<sup>11</sup> Tusambilààyi. Mukalenge Yesù, patùdi twelangana meeji pa Mèyi aa apa, nyewu tudibwinka mpindyewu bwà kubanga

disangisha edi, bwà bunèèmè Bwèbè. Tùbènèshèku, Taatù, tudi tulomba mu Dînà dyà Yesù. Amen.

<sup>12</sup> Mpindyewu, cyena-bwalu cyànyì mu mapingaja emu cidi mwaku umwèpelè: *Shàlom*. Mu cyena Ebèlu, mbwena kwamba ne “ditalala.” Ditalala, anyi mmwoyi wa dyelangana, mmùmwà ne “ditalala diikale nèènù,” anyi, “difika dilenga,” “bètwabu,” ndyelangana mwoyi dyà—dyà mushindù kanà ônsò. Kàdi mwaku wa mushinga wündì musangane mu cyena Ebèlu emu, kùdi bintu bûngì cyanàànà bìdiwu wumvwija, kàdi byônsò abi biikale byàmba ànu cintu cimwècimwè aci ne: “ditalala.”

<sup>13</sup> Bu mutùdì tukùngamangana ne cidimu cipyacipyà eci, tudi tukùngamangana ne byônsò bìbìdì, bu mûngààbadì, mîdimà ne Bukénkè. Mpindyewu tudi tumònà ne Davìdì, mu dyakula dyèndè apa, mmwambe ne: “Eyemena Mukalenge. Tèèka dyeyemena dyèbè mu Yéyè.” Yeshaàyì mmwambe ne: “Mîdimà ya mupimbu yìdi yìlwa pa cisàmbà eci; kàdi bwà Èkèleezìyà ajuuke ne akenkè, mu butùmbi bwà Bukénkè.”

<sup>14</sup> Pa nànkú tudi tukungamangana ne cidimu eci ànu mutùtù twenza bidimu byônsò ebi; kudi ka—kanyinganyinga bwà bilema byètù byà mu matùkù mashààle, ne dindila dyà matùkù àcìlwalwà a Bukénkè bwà butùmbi bwà Kilistò. Kakuyi mpata to, twétù biikale ne mwoyi cidimu eci cijimà, netùpete bilema byàbûngì bitùdì benze, nénku tudi ànu ne cyàkutekemena aci bwalu bidi byenda ànu pamwè ne címpè ne cibi. Aci’s ki mukenji wà macinka utùdì twenda naawu mu nsòmbelu wetù wa panu ewu. Kàdi tudi ne disàンka dyabûngì dyà kwikala ne Mutwangajì Udi musòmbe ku dyàbalùmè dyà Nzambi, bwà kwàkwilangana. Patùdì baswe kwitaba bilema byètù byà ne tûdì benze bibì, dìbà adi Yéyè ùdi ubifwa luse. Yéyè mmûle tente ne ngâsà ne luse, bwà kutùfwila luse ku bilema abi.

<sup>15</sup> Mîdimà ya mupimbu eyi, ndi njinga kwakulapu dyàmbedi ne, yìdiku bûngì cyanàànà pa buloba leelù wa ndaayà ewu, yènda yìffiika ànu kufiika dìbà dyônsò. Ku cidimu ne ku cidimu, tudi tusangana nànkú, ne bu—buloba bùdi butamba kufiika, mu ngaakwìlu wa nyumà, bwalu bàkaadi benda bàbààbacila mu mîdimà. Mpèkaatù wàtambi kuvula. Nyewu tupicila mu citwàfumu ku dipicila eci, dishebeya dyà Mfùmù wa ditùnga, ne bikwàbo, ne bantu biikale bashipiibwa ne cikisu mu ditùnga dyètù mene emu. Mwaba mwine, utùvwà katuyiku bafwanyine kwela meeji ne aci ncifwanyine kwenzeka mu cikondo cyà dishidimuka dyà cyena leelù edi to, kàdi ncyà bushùwà ne ncyenzeke, bwalu mîdimà yà mupimbu yìdi pa bantu. Mpindyewu, aba bììkalà kabàyi baswe kulwa ku Bukénkè, dìbà adi kudi cintu ànu cimwèpelè cîndì mwà kwamba bwà cidimu cicìlwalwà eci, nenùtambe kutùkina mu mîdimà pàdì cidimu cyena ciya apu.

<sup>16</sup> Kàdi bwa aba bììkalà mwà kutangila, mu cidimu cipyacipyà eci, ku Bukénkè abu, dìbà adi nenùtambe kukenka kukenkelamu, too ne ku Ditùkù dipwangane ditùdì bindile adi, dimweneke Dyèndè, kwìkalà mìdimà yônsò mwa kujimina—kujiminyinamu. Nènku bwà bwalu abu, ki bündì ngambidila, Èkèleeyiyà wa Nzambì udi ne mwoyi, leelù ewu ne: “Shalom,” bwalu twétù tudi Makénkè Èndè. Yesù wàkamba ne: “Nudi Bukénkè bwà bàà pa buloba.”

<sup>17</sup> Mpindyewu, muprofeta mmwambe ne: “Mìdimà yà mupimbu pa cisàmbà eci; pa bantu bàà pa buloba, mìdimà yà mupimbu.”

<sup>18</sup> Nukaadiku bamònè, mu bidimu bikesè bishààle ebi, bamwè bàà kunùdì nwènù balùme ne bakàjì bàà bucole bwànyì ebu aba, mùshindù ùdi cidimu cyônsò, bimweka bu ne mìdimà yìdi yènda yivula bikole anyi? Mvwa ngààkula ditùkù adi, ki mêmè kwambila mukàjàànyì ne: “Udi mumanye’s, bìdi bimwèka ànu bu ne, pàdì bidimu byenda bipita, nènku mbyenze ànu bu ne bantu mbabange kwenda kuya ànu kule menemene ne cintu cilelèlè cìvwà cikèngela bwà kutambabu kuseemena pabwípi naaci menemene.”

<sup>19</sup> Ngàcìmònu, munkaci mwà bantu. Tangilààyì pambelu mu misèsù, ne nangananga munkaci mwà bakàjì, tangilààyì majinga abo ne bidibo baswè kwenza, ne bàdì—bàdì munkaci mwà kushintulula bilwinji dìbà dyônsò. Balùme bakaadi benda bátàmba kulwa bu bakàjì, ne bakàjì benda bátàmba kulwa bu balùme, ne biikale bimwèka ànu bu ne kakwena mùshindù wà kucììmanyika to. Ndi mutwe eku ne eku kwà ditunga, nyiisha mpiìsha cintu aci, kàdi ngààlukila cidimu cìdì cilonda anyi bítàmba kubiipa kutambidila ne pangàkabanga apu. Cìdi, bantu abu mbaswe kwenza maalu mîmpè, kadi, bôbò, kùdi cintu kampànda pa bwalu abu cìdi kaciyi mwà kubalekela benza maalu mu mùshindù mujaalame to. Cìdi ànu cibàcincìmike, cibenzeja ku bucole. Ncyenze—ncyenze bu diciima dyà bujitu difike, dibwikidije buloba bujimà. Ki ng’ànú mu Phoenix nkààyaamù to, kàdi pa buloba bujimà, mbimwèke ànu bu ne kùdi mìdimà midyungwije munkaci mwà kudisanga, yenda yitamba kudyunda, dìbà dyônsò, munkaci mwà kupuusa kuumusha buntu bulùme bwà bushùwà, ne buntu bukàjì bwà bushùwà. Ndi ngààkula bwà mu byà mubidi.

<sup>20</sup> Nènku, bôbò, mbimwèke ànu bu ne . . . bìdi byenda bítàmba kubwela mu maèkèleeyiyà. Nènku pashiìshe paùdì ujuuka ne wamba cintu kampànda cyà cicilwisha, dìbà adi bàdi bakupiisha ne bwalu wàcìlwìishi. Nwamònu’s, udi—udi mwà kucimòna cilwa, ne—ne pashiìshe paùdì wakula bwa kucilwiìsha, muntu kampànda ùdi ucyumvwa bibì. Míngà misangu bakàjì bacyumvwa bibì, balùme bacyumvwa bibì, bangata cilunji cibì.

<sup>21</sup> Muntu misangu mikwabo, muntu mwîmpè, bikèngela itabe bintu byà mùshindù awu bwà kushààla mulame milongo yèndè

ya butèndeeli yà mudiye amu, bwalu, yéyé kàyi mwenze nànku to, ùdi wipaciibwa, nènku dìbà adi ùdi—ùdi ùdìshààdila nkààyende. Nènku dìbà adi pàdìye ànu mwipaciibwe mu bantu kampànda, apu mbikole bwà kudiswika ne muntu mukwàbo, bwalu ukaavwaku mumanye ne wèwè udi wa mu musùmbà mukwàbo ewu, dìbà adi ki ne: “Cidi cyenzeke lwà *eku ncinyi?*” Dìbà adi udi mwenzejiibwe bwà kushala mutwè makàsà pansiò mu byûdì mwitàbùùje, anyi kutungunuka ne webè njila, cyanàànà udi uvila byûdì mwitabùùje abi. Pa nànku bìdi biciwija citambe kukola bwà bantu.

<sup>22</sup> Nènku bìdi bimwèka ànu ne cikondo cìdi, kwena mwà kumònà ngiimanyinu mulelèlà awu to, wa muvvabi bikèngela bwà muntu kwikalaye. Ndi... Nàンsha mene mu dicyàngata, kuumukila mu nyumà, mpindyewu kuya mu mubidi, Mémè... Bwànyì mémè bìdi bimwèka bu ne pàdì muntu mulùme ùvwala bisàbaatà byà velour wa diikala dyà rose, ne bintu byà mishindù yônsò byà nànku awu, mbyenze ànu bu ne mbàtàmbe kulwa bu bakàjì. Ne bakàjì banwa mfwanka, mpindyewu bàkaadi ne bifwanka, ne biikale ànu...ne bákosa nsuki yàbò bu balùme; ne bimwèke ànu bu ne dye—dyengeleka, bu-inàbànzà, cintu cyà bukàjì aci kacìcyenaku to. Ne bulùme bwà bushùwà kabùcyenaku to; bimwèka bu ne kwônsò kùdiye wela meeji kùdi ànu ncintu kampànda cyà cibì, luseke lukwàbo alu.

<sup>23</sup> Ngeela meeji ne bìdi ànu bu muvvabi ku cibangidilu: “meeji ônsò mu mwoyi wa muntu àkatungunuka ànu ne kuvwijiibwa mabì.” Ndongamu yètù—yètù, ya ku televiziyyò ne—ne ku tudyòmba, kabeenà bàbikenkete to. Muntu udi mwà kwamba cintu cyônsò, pamwè ne cyônsò, cìdiye muswè kwamba aci, bipendu bya ku bilàmbà mene ne kwamba minèkù yà bukooya, yà manyaanu yìvvwà—yìvvwà mene kayìyì yìkèngela kwikala nànku to, kayìyì nàンsha, kayìyì yìkèngela kwikala myambìibwe nàンsha mu bar to. Kàdi bàdi mwà kuciyàmba ku televiziyyò ne ku tudyòmbà, kàdi kucítuma buludì mu nzùbu yà bantu. Mbimwèke ànu bu ne mîdimà ya mupimbu mmibwikidije cintu cyônsò mu kaabujimà. Buloba bujimà bùdi ànu bu ne bukaadi bukooyike.

<sup>24</sup> Mpindyewu, bidimu ne bidimu, ndi muteetà bwà kukwata dibendele, Dìyì dyà Nzambì. Ne ndi mutambe kupangadika bwà cidimu cilwàlwà eci bwà kukwata dibendele adi kutamba muntùku kacya mukwate mu nsòmbelu wanyi, nwamònù's, kwimana ànu buludi ne Dìyì adi. Mpindyewu, ndi ntekemena ne muntu kanà yônsò udi ubweja mu meeji èndè ne ndi ngenza nànku bwà budimù, dìbà adi, mwaneètù wa balùme, mwaneètù wa bakàjì, s'nciyà bushùwà ne wèwè udi mu ntupakanyi. Ndi ngenza aci bwalu ndi muswikiibwe ku Cyôcì aci. Mémè, ndi ne cyà kushààla ne Dìyì adi. Cyônsò cìdiDi dyàmba aci, nciyi nsakidila dyumvwija dyà muntu dyà pàà nkààyende to, kuCyàmba ànu mùshindù awu. Mpindyewu kudi bamwe

bàdi bafwanyine kwikala bakumbane mwà kuDyumvwija ne kudifikisha ku dyumvwikaDi bishìllangane ndambu, kàdi mêmè ncyêna mwà kwenza aci to. Mwakulu ùmwèpelè ûndì mêmè mumanye ncidi cifùnda Mwab'ewu, ànu müşhindù ùdì Eci ewu amu.

<sup>25</sup> Mpindyewu, kukaadi ndambu wa bidimu, bidimu bitwe ku bisàtù, bikaadi pa kukumbana, pàvvà, kumbelu, ku èkèleeziyà wanyì, Nyumà Mwîmpè mwakùla naanyì, wàmба ne: "Nda ku Tucson, kùdi cintu kampànda cìdì cindile." Mêmè kwimana pa cibumba cyà ku cyambilu apa ne kwambila muntu ne muntu wa kunùdì ne: "EMU MMÙDÌ MUKALENGE WÀMBA, cintu kampànda cidi pabwîpì ne kwenzeka." Pàmwäpa kùdi nkama ya bantu basòmbe kaaba aka bàdi bacimanye. Mvwa munwâmbile ànu cîmvwà mumône. Mukenji udi pa mukàbà wa mêtì ne, *Tudi Dibà Kaayi, Mukalenge?* Mêmè kumònà cisùmbù cyà Banjèlo, cyenze bu—bu cipaapu cyà musàkà, cipweka ànu ku nord wa Tucson kwaka; Iwà mu nùnku ewu, ku nord wa Tucson. Ki Bôbò kwakula naanyi cintu kampànda, kàdi ncivwa mumanye ne civwa ncinyi to. Nènku dîngà ditùkù kùdì... Kùdi bantu basòmbe kaaba aka patùdì twakula apa mene, bàbidì bàà kudibo, bàvvà naanyi, kwinààku pàvvà bwalu abu bwenzeke.

<sup>26</sup> Ki kuCikwatabo fôtô mu dyulu. Kupatukaci mu—mu cikàndàkàndà. Mvwa ngeela meeji ne mvwa ne cibejibeji aci. Eyowa ndi naaci. Ki cyôcì aci. Nudi nucimona mwaba ewu mu cikàndàkàndà cyà *Life*, mu eci cibejibeji, ànu menemene muvwa Nyumà Mwîmpè mwambe ne necyenzeke.

<sup>27</sup> Nènku ke Banjèlo mwandamutekète abu biimane ànu munùdì bammònè mwimane apa emu, e kungambila bwà kupingana kwànyì kumbelu, ne, maalu masokoka avwà balongolodi munda mwà bikondo bapangile mwà kulenga awu, maalu masokoka a Bible, avwa Bitampì Mwandamutekete bilame awu, avwà ne cyà kubuuludiibwa. Ndi ngeela ní nganyi ní nganyi kadyòmbo, bwà angate *Bitampì Mwandamutekete* abi abikenkete, ní wàsànganamu kalèma. Nwamònú anyi? Nwamònú anyi? Bwalu mbifidìibwe ku disonsodiibwa dyà Nzambì.

<sup>28</sup> Kumpàla kwà cyôcì aci, mvwa muyishe pa *Bikondo Mwandamutekète Byà Èkèleeziyà*, ne pashiishe mubizòla ku cibàsa mu tabernacle wanyì.

<sup>29</sup> Dilongesha dyànyì, ncitu nyiisha Dilongesha dyà nshindameenu pambelu to, ànu bishìmikidi binène byà butangadiki; bwalu ndi munkacì mwà bânà bëétù, mbafwànyine kupangakanangana naanyì, ne ncyena nteeka Cyôcì aci kumpàla kwà bantu bàdi apa aba to. Ndi nteeta ànu bwà kushàala mu bishimikidi byà menemene byà Mifundù, bu bitùdì twitabuuja ebi. Kàdi, ku tabernacle wanyii, bàdi baCikwàta pa mukàbà wà mêtì. Wewè muCìswe, udi mwà kuCipeta. Piikala mpaasàtà

webè kàyi muswe bwà wêwè kuCipeta to, kuCyàngaci to. Nwamònù's, aci ncikutangile ànu wêwè.

<sup>30</sup> Kàdi mwômò amu, pâmvwà nyiisha pa *Bikondo Mwandamatekete byà Èkèleeziyà*, ne bwà kwikalà ne dyanyisha dyà kudi Nzambi; kubizola, mu mùshindù wàkabwela mîdima mu èkèleeziyà, ku Nicée; ne banjèlo bàà èkèleeziyà, baamisànjeela abu. Cîwva ne cyà kwikalà mu cyôcì, bwalu, ndi mwenze ànu nyizola too ne ku cikondo cyà ndekeelu cyà èkèleeziyà, mu dîndà dyà dyàlumingu, pa dîbà dikumi ne umwe jaajaaja, Bukénkè bunène abu kupwekadu mu nzùbu amu, kumpàla kwà bantu bûngì bu bwà bàdi basòmbe apa aba; kupwekadu ne kukenkeshaBu ku cibadì cyà cimanu, ku mêsù kwà bantu bônsò abu, ne kuzolaye Bikondo byà Èkèleeziyà abi ànu menemene mûmvwà mubizòlaku amu. Mpindyewu, kûdi nkamà ne nkamà yà bantèmù muntwamu bwà kujaadika cyôcì aci. Ànu...

<sup>31</sup> Èè, mpindyewu, tudi bamanye ne Nzambi ùtu misangu yônsò ànu uléeja bintu mu dyulu kumpàla kwà kubileeja Yé pa buloba. Muvwa beena meeji balonda mutootò, ne bikwàbò amu. Cimanyinu cyà mu dyulu cidi cyenzeka, dyàmbedi, pashiìshe cyà pa buloba cidi cishindika cimanyinu cyà mu dyulu. Nzambi ùtu ukwata mudimu, wenza maalu mu bimanyinu, bimanyinu ne maalu àà kukèma. Bidi ne cya kulonda beena kwitabuuja myaba yônsò. Beena Yuda bavva misangu yônsò ànu bakeba cimanyinu, bwalu bavva basungula bàà Nzambi, nènku bàvwa bakeba cimanyinu. "Tulèèje cimanyinu, apu kaayi netwitabuuje." Nènku, dîbà adi, pààkalwà beena meeji ne bwalu bwàbò abu, Beena meeji abu, ku dilediibwa dya Kilistò, ànu ku cidimu cipyacipyà aku.

<sup>32</sup> Mpindyewu tudi tusangana ne ngondo, mu Bible, ùdi ùleeja èkèleeziyà. Ùdi ùleeja bukénkè pa buloba, pàdì dîbà kadiyipù to. Bwakabuulwibwà, nshapita wa 12, ùdi bulelèlè ùcyùmvwija: "mukàjì mwikàle ne ngondo mwînshì mwà makàsà èndè, dîbà ku mutù kwèndè." Ne mudibi ne pàdì dîbà kadiyipù to, pàdì dîbà diye ku luseke lukwabò lwàlwà, ngondo ùdi ùleeja nsèse yà dîbà pa buloba. Èkèleeziyà ùdi ne cya kuleeja Yesù Kilistò kûdì bàà pa buloba, pàdì Mwânà wa Nzambi kàyipù to. Tudi bônsò twitabuuja aci. Ncintu cyà pabwâcì, bu mudibi bitambe kushìllangana.

<sup>33</sup> Kàdi pâmvwà ngaakula kaaba aka, mu cidimu cyà 1933, bwà paapà ùùmuka mwaba wèndè mu, anyi ûpatuka, eyowa's wè, mu Loomo, ne ûkendakana ku malaba à cijila awu—awu. Yéyè neàlwè kâbidì apa. Nènku cintu cidi cikèmesha, ncyà ne, ndambu wa malòòlò kumpàla kwà kuumukaye ku Loomo, bwà musangu wà kumpàla wà kwenzekaci kacya maalu malonda, ngondo kupwekaye ne kubwelaye mu lundiimbà lwà dîbà ne ngondo. Ànu aci, civwà ncinyi? Ùjika ne mundidimbì Bukénkè buleejibwe bwà Mwânà. Mu lwendu elu, yéyè kwakula ne taatù wa ba-

Orthodoxes; nènku bônsò bâdi mu dyumvwangana ne: "Paapà ùdi wenza bwalu ebu bwà bwobùmwè, bwobùmwè bwîmpè bwà bwena mutumba." Cidì cyumvwika, ku dicì dyà mubidi, bu cintu cyà citambe kwikalala cilenga cyà dikema civwa mwà kwenzeka. Kàdi ku dicì dyà nyumà, mmîdimà pa yôyi. Ne mutùdi twêtù maèkèleeziyà, twêtù ba-Presbytériens, ba-Méthodistes, ba-Baptistes, ne beena Mpenta, bafwànyine kukadibwinka mu bukooyà bwà mùshindù awu, pètù bamanyè ne Bible wetù ùdi uyiisha bishiilangane ne abi! Ncintu cyà dikema bwànyì mêmè, bwà mùshindù ùdi muntu muuijibwe têntè ne Nyumà mwà kusòmbà mu myaba bu nànku kwamba ne: "Bidi byumvwika byà nyumà bwà kwikalala mu mwaba bu nànku." Bwànyì mêmè, s'bidi byenza bwôwà.

<sup>34</sup> Mpindyewu, ngeela meeji ne nudi naaci muneemu mu Phoenix emu. Bu muntu... Mbanganyi mwab'ewu bakààdiku bamône mwaba wûmvwà muzôle Bikondo byà Èkèleeziyà abi? Elaayi byanza muulu. Ngeela meeji... Nudi numònà mwàkabizòla Mukalenge mu maulu, dilòòlò adi anyi? Ànu menemene mùshindù ùdibi bizola ku tabernacle kwàka awu. Bipwangane, ànu menemene mùshindù wàkacifilà Nyumà Mwîmpè ku disonsodiibwa, kùkaadi bidimu bisâtù, ku tabernacle, s'ki cyôci aci cyenzeke mu maulu. "Mukana mwà bantemu bàbìdì anyi bàsâtù, dìyì dyônsò dijaadikiibwè." Nyumà Mwîmpè ûvwa dyàmbedi mutantémuka ku disonsodiibwa; mvwa mubizôle pa cibumba cyà ku cyambilu apu. Pashìishe kutùùlukaYe ne kwenzaYe dishindika dyàci, mùvvwà ngondo ne Bukènkè byenda bipatuka, bipatuka, ne kulwa too ne ku Cikondo eci cyà Laòdikiyà kubwela cyàkàbìdì mu mîdimà yà wòò. Kàdi's ki Yéyè ubi upweka ewu ne ucishindika pa ngondo, ànu pa dîbà mene dìdì èkèleeziyà yônsò pamwè yìkàdyungwija mu cimuku, cyà nsangilu wa maèkèleeziyà.

<sup>35</sup> Kabyèna bikemesha to, bu mwàkambà Yeshààyì ne: "Mîdimà ya mupimbu yìdi pa buloba, pa cisàmbà eci."

<sup>36</sup> Ndi mumanye ne kî mbyà luumu bwa kwakula kupììsha bulongolodi to, kàdi's ki cimanyinu cyà nyama wa lwonji. Ki cintu mene cyàyà neetù bulùdì mu cyôci aci. Cidi cyenza cimfwanyi cyà nyama wa lwonji. Ncyêna ngàamba aci bwà kufiïka munda to. Ndi ngàamba aci bwalu m'Bulelèà, bânà bëëtù. Ditùkù nedilwe dyàjuuka Phoenix, ne pàmwàpa mêmè mumane kuya, kàdi nenùmanye ne civwa ng'EMU MMÙDÌ MUKALENGE WÀMBA. Ncilelèlè. Ne mùshindù ùdi Nyumà Mwîmpè munène awu mushindike Mayiisha awu ne mudyanjile kwamba maalu, kaàyikù apangila musangu nànsha ûmwè! Kàdi citùdì twenda tubaabacila mu mîdimà ncinyi? Bwà cinyi bantu kabènakù mwà kutabuluka pàdì dîbà kadìyì dyanji kuya apa's? Dîmwè dyà ku matùkù àdì pansi aa, dîbà nedìükalè dimane kuya bikole, apu ngwêwè mumane kupeta cimanyinu aci, ne dîbà adi kakwenaku... Kakwena cintu cikwabo nànsha cîmwè

cyûdì mwà kwenza pa bwalu abu to dîbà adi, nebàkubùcìkile mu ndongolwelu awu, ne udi mutwibwe cimanyinu kùdì ndongolwelu awu.

<sup>37</sup> Bwà cinyi kùyi ulwa kùdì Kilistò, kuuijibwa têntè ne Bukénkè bwà Èvànjeeliyò wa Yesù Kilistò, Bukole Bwèndè bubìishì bwà ku lufù bùdi mwà kukuvwija mudishikaminye abu, ne kukuvwija kandeyì kàdi katèèka pa kakuna? Nànscha mìdimà milwà bishi. Wêwè udi wamba ne: “Èè, bwà cinyi bivwa bikèngela twêtù kucyenza? Bakwabo abo...” Teelejààyì, mpindyewu mene ke dîbà dyà kucilekela cikenka, padibi byenda bitamba kushààla mìdimà apa. Ki pàdi Bukénkè bukenka bìmpè menemene, mpàdìBu mu mìdimà. Tudi misangu yónsò ne cyà kulekela Bukénkè bukenkeshà mwaba ùdi mìdimà awu.

<sup>38</sup> Muprofeta wàmба ne: “Mìdimà ya mupimbu neyììkalè pa cisàmbà eci,” ne ncyà bushùwà ne m’Bulelèlè.

<sup>39</sup> Mpindyewu tudi tusangana cìdi cyenze bwà ngondo àleeje bukénkè. Nzambì ùleeja, dyàmbedi, ku mboodì; pashiìshe, ku Bwikadi Bwèndè Yéyè mwine; pashiìshe mu maulu kuleeja Yé cimanyinu. Ki pashiìshe paapà kupatukayè mu Loomo, kuya kabwela mu Pàlèstinà; ciine aci, bwà dìsù dyètù dyà buntu edi, bantu kwelabo mbila mikole ne kutwa mpala pansi, ne kukuukwila muntu awu. Nciyi nende cilumbu ànu mûndì nciyi cilumbu ne muyiishi udi mufwanyine kudiswika ne byà nànku. Cyônsò cìdi ànu nyumà umwèumwè awu.

<sup>40</sup> Mbimwèke ànu bu ne mìdimà yà mupimbu mmisòmbe pa cisàmbà mu mûshindù wà beela meeji ne cintu cimwèpelè cidi cikèngela kwenza nkuya mu èkèleeziyà ne kwikalaku ànu muntu mwímpè, kufunda dînà dyèbè mu mukàndà, ne kaacintu kampànda kakesè kàà kakayì kuumvwika kàà ne: “Nzambì neànyunguluje lusapi paùdì ufwà, ne neàshintulule nyumà udi munda mwèbè awu, amutangije kudiYe.” Udi mutupakane. Paùdì ufwà, ànu mùdì nyumà udi pambidi pèèbè awu, ke muwìkala wêwè kashidi. Ne vùlukààyì ne, Bafaalesa, Basadoka, ne bakwàbo, bavwa batèndeeli bàà dikema.

<sup>41</sup> Nzambì ùtu Nzambì wa mukawu. Ùtu ne mukawu, ne mMuswè mukàjì Endè ikale mukezuke. Mmuswe bwà yéyè ikale virgo, mudilaminyìne. Cintu nànscha cimwè pa buloba mu yéyè to, nànscha cimwè; ànu Dîyi Dyèndè mu kaabujima, citùpà Cyèndè. Tudi ne cyà kwikala citùpà cyà Dîyi. Kaciyi citùpà cyà twitabaya to; citùpà cyà Dîyi! Kaciyi citùpà cyà èkèleeziyà to; citùpà cyà Mukàjì-musela! Èkèleeziyà mmupiìshìbwè, tudi bamanye ne yéyè ùyaaya ku mìdimà ya pambelu ayi, kàdi Mukàjì-musela ùdi ubànda.

<sup>42</sup> Mpindyewu bantu bìkkalaku ànu mwà kutabuluka bwà katancì kakesè cyanàànà ne kujingulula cìdi cintu cinène aci ne ncinyi's we. Mmaleela adi enza nànku. Mbantu bàdi-bàdi baswè kwenda mùdì bakwàbo bàà pa buloba benda amu. Kwêna

mwà kwenza aci to. Kwêna wa pa buloba to. Nudi nwela meeji ne mukàjì mwadija mu mushèètè mmufwànyine kujinga bwà kumanya nsuki yèndè ní mmiluka ne mundula, anyi mwônsò munùdì baswè kucibiikila amu? Nudi nwela meeji ne yéyè mmufwànyine kutuma meeji ku mùshindù uvwaye muvwale pìikalabi ne uvwa mwadija mu mushèètè, anyi muntu mulùme kampànda anyi? Ki mbafwànyineku kucyènza to.

<sup>43</sup> Nènku ki bwà cinyi, leelù ewu, kùdi bintu bûngì cyanàànà bikààdi bìkèngela bwà twêtù kutentula kùdi beena mutumba, anyi kùdi kampànda mwende luumu wa mu Hollywood, anyi modèlè kampànda, anyi cintu kampànda cyà mùshindù awu, mbwalu katwena banji kufwa kùdi Kilistò ne Dîyì Dyèndè to. Mbwalu kaayi ebu ne maèkèleeziyà? Tudi mu mídimà, munkaci mwà kwenda kubaabata mu mídimà. Yéyè wàkamba ne: “Nekwìkale mídimà ya mupimbu pa bantu.” Mídimà ya mupimbu pa cisàmbà mpindyewu!

<sup>44</sup> Biine byônsò abi bìdi byumvwija cinyi? Bìdi byumvwija eci ne, padi buloba... Cìdi cibwicidije ngondo, mbwalu dí-díbà... buloba bwakabwéle mu mundidimbì wà díbà, divwa didileeja pa buloba adi. Buloba mbubwele mu mundidimbì. Ki lutatù lùdì naalu èkèleeziyà ndwôlù alu. Ki lutatù ndwôlò alu lùdì naalu ba-Presbytériens, ba-Méthodistes, ne beena Mpenta. Ki lutatù lutùdì naalu twêtù bônsò ndwôlò alu. Buloba bùdi bùjika Bukénkè butùdì ne cyà kwikala kuleeja, bunyunguluka bubwelaMù, ne, pàdibi bìpitangana, bùdi bwelapù mídimà.

<sup>45</sup> Ne maalu a pa buloba mmabwele mu èkèleeziyà, mu-mu dínà dyà dingumba, dínà dyà twitatabaayi kampànda, ne “tudi batèndeеди ne byônsò ebi ne byônsò ebi,” kàdi nànscha nànsku bùdi buvila bukole bubììshi bwà ku lufù bwà Kilistò bwà kushindika Dîyì Dyèndè divwà dyambiìbwé mu ciprofeta bwà ditùkù edi. Kùdi mwà kwikala Bukénkè ànu ku Dîyì dyà Nzambì. Aci tudi bamanye. Nzambì, ku cibangidilu, wàkamba ne: “Bukénkè bwikalèku,” ne bukénkè bwakiikalaku, dishindika dyà Dîyì Dyèndè dyàkambà Ye adi.

<sup>46</sup> Mifitù, kufìkishiibwa! Buloba kujaalamanganabu ne dikenkeshiibwa dyà díbà kùdi ngondo, kàdi kufìkishiibwabu. Ki cyàkenzekà menemene mu mubidi, anyi mu nyumà. Ànu mwàkenzekabi mu mubidi, bidyànjila kuleeja mu mundidimbì ne bitwàmbila, ke cìdì cyenzeke menemene.

<sup>47</sup> Mpindyewu, tàngilaayi nùmonà kùdici cikoobeka. Bâàbûngì bàà ku nwènù bansongà, kabiyàkukèngèla bwà nukole nubooboke bwà nwènù kushiìsha kucimònà to, nànscha byà munyi, panwikala bashààle ne mwoyi bidimu bikwabo bìsâtù anyi bìnaayi.

<sup>48</sup> Ngondo mpindyewu, tudi mu Cikondo cyà Èkèleeziyà wa Laòdikìyà. Mu Cikondo cyà Èkèleeziyà wa Laòdikìyà, ku èkèleeziyà mikwabo yônsò eyi, Laòdikìyà, cyà ndekeelu,

èkèleeziyà wa civùmvù, Kilistò ùvwa pambelu pàà èkèleeziyà. Mubadi kanà yônsò wa Bible ewu's mmumanye aci. Bwàkabuulwibwa 3, Yéyè ùvwa pambelu pàà èkèleeziyà, Ùteeta bwà kwalukila cyàkàbìdì, ne kacya kààkambaku ne Yéyè mmubwele nànsha. "Kàdi aba bàdì Yè mutambe kunanga, Ùdi ùbàtandisha ne ùbànyooka." Mukenji neùtandishe ne neùnyooka aba bàdì Yè munange. Mpindyewu, ùvwa ùkookola, ùteeta bwà kubwela; mìdimà mìCikàngile, ànu cìdì cyenzeke menemene. Bukénkè buvwa bukenka abu, kakuyi mpatà to nebùjime ànu bwônsò nkòòng katàtaaka. Byônsò abi nebikadyènzè cimfwanyi cyà nyama wa lwonji. Ne tudi bamanye cìdì aci cyumvwija, ki cikondo cyà nshìikidilu ncyôci aci.

<sup>49</sup> Nzambì, ku cibangidilu, wàkatàpulula bukénkè ne mìdimà, ne cyôci aci kàbìdì ke cìdì Nzambì munkaci mwà kwenza. Nzambì ùdi ùtápulula bukénkè ne mìdimà. "Ku cibangidilu," mwàkambà Ye, "bukénkè bwikalèku." Mpindyewu, vùlukààyì ne, kakwèna mwà kwikala bukénkè kampànda pambelu pàà Díyì dyà Nzambì to. Díbà mene dìdì pambelu pààpa adi's n'Díyì dyà Nzambì, dishìndika. Kuvwa mìdimà ya mupimbu pa buloba, diciima ne mafwima pa buloba, ki Nzambì kwamba ne: "Bukénkè bwikalèku." Mpindyewu ambààyibi tûng bu ne kakuvwa kulwe bukénkè nànsha bumwè? Díbà adi kabivwa mwa kwikala ne dikwacisha bwà Yéyè kwakula to. Kàdi pààkamba Ye ne: "Bukénkè bwikalèku," ne bukénkè kwikalabu, ushìndika ne Díyì Dyèndè divwa dilelèlè. Bukénkè butùdì twendelamu leelù ewu ebu.

<sup>50</sup> Nenku Bukénkè bumwèpele butùdì mwà kwikala naabu leelù ewu, mu èkèleeziyà, n'Nzambì mwikale ushìndika Bukénkè Bwèndè kùdì lukòngeo elu.

<sup>51</sup> Lukòngeo ne lukòngeo lwônsò lùvwa ne cyàlù citùpà bûngì kampànda cilùkòsela, cìvwà cyenzeke mu abo matùkù. Twêtu bônsò tudi bamanye nànnku. Baprófeta bàvwa bâlwà mu cyalu. Bôbò, Díyì dyà Mukalenge dìvwa dìlwa kudibo, bôbo baDyuumwa. Mwena lùmònò, mu Dipungila Dikulukulu, mbwena kwamba ne: "ewu udi Díyì dibuuludiibwa kudiye awu." Ne mùshindù ùdibo bàcimanya, mbwalu ùdi udyanjila kumanya maalu ikala mwà kulwa. Nenku Díyì dyà Mukalenge dyàkalwa kùdibo, cikondo ne cikondo cyônsò.

<sup>52</sup> Yesù wàkambila Yone, anyi bwà Yone ne: "Yéyè nguvwa bukénkè buvwa bùbàlakana ne bùkenka, bwà katancì." Bwà cinyi? Yeshààyì, bidimu nkama mwandamutekète ne dikumi ne bibidì kumpàla kwa kulediibwaye, wàkamba ne: "Kudi díyì dyà ewu udi wela lubilà mu cipèèlè." Maalaki, nshapita mwi3, mmwambe ne: "Monaayi, Ndi ntuma musanjeela Wanyi kumpàla Kwànyì, bwà kulongololaye njila kumpàla Kwànyì." Nwamònou's, yéyè uvwa Díyì adi diikale dishìndika. Díyì divwa dilayìlbwe bwà ditùkù adi, yéyè ùvwa bukénkè, bwalu yéyè uvwa munkaci

mwà kukùmbaja Dîyì diine divwa Nzambì mwakule bwèndè yéyè adi.

<sup>53</sup> Nènku pààkalwà Yesù, Yone wàkamba ne: “Ndi ne cyà kujimina mpindyewu; Yéyè ùdi ne cyà kumweneka patòòke.” Ne Yéyè nguvwa bukénkè abu. Munda mwà bikondo byônsò, mwàkaakulà Nzambì bwà dîbà divwa dilwa adi!

<sup>54</sup> Mmunyi mwàkapangila balombodi bâà èkèleeyìà abu kuCimònà? Mmunyi mwàkapangilabo? Mmunyi mwàkapangila Bafaalesa ne Basadoka abu kumònà’s? Yéyè wàkamba ne: “Kenketaayi Mifundù, bwalu mu Yôyì ayi mmunùdì nwela meeji ne nudi ne Mwoyi wà Cyendèlèlè, kàdi Yôyì ayi’s ki Yìdi yimfidila Mêmè bujaadiki.” Mmunyi mwàkapangabò kuCimònà, bânà bètù? Mbwalu cïkaavwa cyàmba mu ciprofeta ne bôbò nebenzè nànkù.

<sup>55</sup> Ki mùdìbi kàbidi leelù ewu ne, mîdimà ya mupimbu yìdi yìlwa pa bantu, kàdi’s ki yôyì eyi! Nzambì mmwabanye Dîyì Dyèndè bwà kumweneshiibwadì ditùkù edi, ne ki Bukénkè bumwèpele butùdi naabu, ne Nzambì neenzè bwà muntu kampànda àmwèneshe Dîyì adi. Muntu kampànda neàcyénnè. Yéyè mmucìlayè, ne Yéyè ùdi ûkwàta mudimu ànu menemene mûvwà Ye misangù yônsò mwenzè bilondeshile cyôcì aci amu.

<sup>56</sup> Kacya Yéyè katu mwanji kushintulula citembelu Cyèndè cyà mudimu aci to. Udi wènza ciprofeta cyà cìikala mwà kwenzeka, pashìshe Ùtùma muntu kampànda bwà kucishindika. Nènku cìdi cipicila pa mitù ya miliyô ne miliyô, bwalu, mîdimà mmibwikile buloba pa dîbà adi. Ne bantu mbanange mîdimà bikole kutamba mudîbo bananga Bukénkè, bwalu mîdimà yìtu yitamba kusankisha.

<sup>57</sup> Mvwa mumònè dinàya dyà Hollywood, àbìdì àdì pansi aa, dyàmba ne: “Mwoyi udi ubanga paanyimà pàà dîbà dimane kubwela.” Aci’s ki pàdì lufù lutwàdija; binwìnù byônsò byà maala byà bufukù ebi, ke mudibo beela meeji ne badi benzà vie. Bàdi bapùnga ne lufù.

<sup>58</sup> Nzambì, ku cibangidilu, wàkatapulula bukénkè ne mîdimà. Yéyè ùtu misangù yônsò ànu mwenze nànkù. CìdìYe wenza ncinyi? Ùdi ùyicincimika, ku bukénkè bùdi bùlwa abu, Ùdi ùcincimikila mîdimà ku luseke lukwàbo lwà buloba.

<sup>59</sup> Nènku ke cyôcì aci menemene cyàlwà kwenzeka mpindyewu. Mpabwípì menemene ne ditùkù kubangadi. Mütootò wà mu dîndà mmupatuke bwà kusekelela dilwa dyà ditùkù. Ne Nyumà Mwîmpè uléeja Bukénkè Bwèndè. Kulwalwa cikondo cìikala Bukénkè ne mîdimà ne cyà kutapuludiibwa, cimwè ku cikwabo. Èkèleeyìà ne bulondyanganyi bwèndè neàngate dîyì dituma dyà ditùkù; ne Kilistò ne mulayi Wèndè Dîyì-Bukénkè neàye mu Dyambwibwa. Ki cintu cimwèpele cìdi cibàshààdile bwà kwenzabo aci. Nditùkù, leelù ewu, nkabundubundu kàà ditùkù dipiyadipyà, bwà bààbûngì bàdi bindile Dilwa Dyèndè.

<sup>60</sup> Bantu bààbûngì, bîmpè bàà meeji matòòke leelù ewu, aci's ki cìdì cilàkusha myoyi yààbò kapyà, bantu bààbûngì, bîmpè bàà meeji matòòke bu Mâriya ne Yòzèfu. Bâvwa bafumina ku diifesto, kàdi kushiyabo Yesù. Bantu bààbûngì bâdi benza cintu cîmwècîmwè aci leelù ewu, beela meeji ne Yéyè ùdi naabo. Mpindyewu, ndi muswè kunushikikila kaabukênkè kakesè aka, bwà kunuleeja mùdì Dîyì dyà Nzambì kadìyì mwà kupangila.

<sup>61</sup> Twêtù bônsò kaaba aka, mu mapingaja emu, bâdì beena Kilistò, tudi twitabuuja ne Yesù Kilistò uvwa Dîyì dyà Nzambì, dimwènèshìibwe. Tudi twitabuuja ne Yéyè uvwa mulediibwe kùdì virgo. Yéyè nguvwa tabernacle muvwa Nzambì wa Bukole bwônsò mwele ntenta musòmbèle, panu pa buloba apa. Kàyi ànu muprefeta patupu to, kàyi ànu muntu wetù wa patupu ewu to, kàdi Nzambì Yéyè mwine mumwènèshìibwe mu mmwenekelu wa muntu. Yéyè uvwa Èmanùwèlè: "Nzambì neetù." Tudi twitabuuja nànku, ne mwoyi wétù wônsò. Nènku mpindyewu monaayi pàdì Marta anyi . . .

<sup>62</sup> Mâriya's wè, eyowa, ne Yòzèfu, beela meeji ne Yesù uvwa naabo, bavwa bôbò ànu bâdfwanyikijile mu lungènyi ne Yéyè ûvwa naabo, beela meeji ne: "Bidi ànu ne cyà kwikalà bîmpè. Yéyè ùdi ne cyà kwikalà neetù." Kàdi bavwa batupakane bibì be. Kàvwa naabo to.

<sup>63</sup> Bâàbûngì be leelù ewu, bantu bîmpè bâdi mùshindù awu. Bâdi beela meeji, bâdi bamòna dîbà dyenda diseemena, bamanye ne cintu kampànda cìdì cyàmbà kwenzeka, cidibo benza ncinyi? Bâdi bayá kashààla beena èkèleeziyà, beela meeji ne Yéyè udi naabo. Bâdi bâlabulangana ku cyanza ne muyiishi, beela meeji ne ki cyônsò cidi cikèngela kwenzabo: "Yéyè ùdi naabo." Bashindika anyi babàtiiza mu mùshindù kampànda, ki cyônsò civwà cikèngelabo kwenza aci, beela meeji ne Yesù ùdi naabo. Mwanèètù wa balùme, mwanèètù wa bakàjì, ànu mùvwà Mâriya amu, Yòzefù, bàà kale abu, bantu bàà meeji matòòke ànu bàà menemene, kadi nànsha nànku mbatùpàkàne.

<sup>64</sup> Nsòmbelu webè ùdi ùjaadika ne Yesù ùdi neebè anyi këna neebè to. Nsòmbelu webè ùdi ùleeja ne anyi Yéyè ùdi ùsòmbèla kaaba aka, anyi Yéyè ùcìdi ànu mu maulu Èndè amu anyi to, cyônsò cyûdi aci. "Byenzedi bîndì Mêmè ngenza nenùbyénzè pèènù." Mmuniyi mùdì mufwanyine kwikalà ne Kilistò munda mwèbè, ne pashiìshe Nyumà mwine ùdi munda mwèbè awu uvila Dîyì Dyèndè, wangata twitabààyi kampànda pa kaaba kààdì? Kacyèna mwà kucyenzaku to. Yéyè's mmufwànyine kuDìcimuna pa kuvila Dîyì Dyèndè Sungasunga.

<sup>65</sup> Ànu bwalu kampànda mufilePù dyumvwija dibì anyi? Udi ne Bible, udi mwà kubala ànu mùdì muntu mukwabo yônsò ewu. Ikala ne meeji matòòke.

<sup>66</sup> Davidì wàkamba ne: "NuMutèèkààyi misangu yônsò kumpàla kwènù." Twikàle bamanye ne patùdì tutwilangana

ne cidimu cipyacipyà eci, tudi tutwilangana nààcì mu bukole bwà dibiïka dyà ku lufù dyà Kilstò. “Yéyè ùdi misangu yônsò kumpàla kwànyì. Mêmè ncyàkunyungishiibwaku to.”

<sup>67</sup> Monààyi mùdi Dîyì kadìyi mwà kupangilaku to. Mâriya ne Yòzefù...Mpindyewu bwènù nwénù, nwénù balunda bàànyì bananga beena Kàtòlike, bâtù bambe ne Mâriya uvwa maamù wa Mvidi Mukulu. Mâriya kàvwa nànsha mene maamù wa Yesù to, kuleka byà diikala maamù wa Mvidi Mukulu abi. Mmunyi muvwàye mwà kwikalà nànnku? Bushùwà. Kakwènakù musangu nànsha ùmwè ùtuYèku mumubiikile ne maamù to; nànsha kakesè.

<sup>68</sup> Bâvwa balwa kudiYe musangu kampànda, bàmba ne: “Mamwèbè ne bânà bèènù mbindile pambelu.”

<sup>69</sup> Yéyè kutàngila disangisha Dyèndè, wàmба ne: “Maamù Wanyì nganyi? Bânà Bèètù mbanganyi?” Kutàngilayè bayiidi Bèndè, wàmба ne: “Aba bâdì bènza diswa dyà Taatù Wanyì, ki bâdì maamù Wanyì, Wanyì...”

<sup>70</sup> Ku nkùrusè, pavwaYe munkaci mwà kupùnga ne lufù, Wâkamba kàbìdì cintu cìmwècìmwè aci. Kwambilaye Yone, Yone ewu, muntu ewu ne: “Mwânà wa balùme, mona mamwèbè!” Ki nne: “Maamù, mònà mwanèèbè wa balùme to.” “Mukàjì, mònà mwanèèbè wa balùme!” To, nwamònou’s, kavwa maamù wa Nzambì to.

<sup>71</sup> Yéyè ùvwa ànu difù disomba dyàkakwàta nààdi Nzambì mudimu; kî nkutamba mukàjì kanà yônsò ùdi Nzambì mwà kupangadika bwà kukwàta nendè mudimu to. Mmuwfànyine kukwàta mudimu ne difù (dyèbè) dyà mwoyi wèbè, bwà kwamba patòòke Mwân’Endè, bu wêwè—bu wêwè ànu mwà kuMulekela ùcyenza. Nwamònou anyi? Kayi maamù wa Mvidi Mukulu to. Kuvwa ne cyà kwikalà disansakata, nànsha bwa kwikalaci dimiinu dyà Mâriya. Yéyè kavwa nànsha dimiinu dyà kùdì Mâriya to.

<sup>72</sup> Civwa, cintu cyônsò mu kaabujima, civwa n’Nzambì, Mufuki awu. Piìkala Adama wa kumpàla kwaka awu mufukiìbwe kakùyi taatù ne maamù, Adama Mwibidì uvwa cintu cìmwècìmwè aci. Ne cintu nànsha cìmwè cishààdile ku aci kacivwa cifwànyine kuMuteeka pamwè Nendè to. Ncyà bushùwà. Nzambì umwèumwè awu, Wâkafuka mubidi mùvwaYe Yéyè mwine musòmbèle.

<sup>73</sup> Mpindyewu tudi tusangana ne, tangilààyì mùdì, tangilààyì, piìkalabi ne Mâriya ùvwa maamù wa Mvidi Mukulu, mwàkatupakanaye, muntwamu. Yéyè ne: “Mêmè ne tatw’Ebè tudi baKûkebe ne binsonji.” Uvila dilediibwa dyà kùdi virgo, “Tatw’Ebè, Yòzefù, ne mêmè, tudi baKukebee.”

<sup>74</sup> Tangilààyì Mwânà wa nsongàlùmè wa bidimu dikumi ne bibidi awu, Mwânà wa balùme wa bidimu dikumi ne bibidi awu, wàmба ne: “Kanwèna bamanye ne Ndi ne cyà kwikalà

mudifile ku maalu a Taatù Wanyì, nkokangana ne mangumba awu kuntwaku anyi?" Mpindyewu, bu Yéyè ne, mmudifile ku maalu à Yòzefù, nùnku Ùvwa kwikala ùsanganyiibwa ku ditanda dyà mabaya adi. Yòzefù kavwa tatw'Endè to. Nzambì nguvwa Taatw'Endè. "Kanwèna bamanye ne bivwa bikèngela Mêmè kwikala mudifile ku maalu a Taatù Wanyì anyi?" Kuntwaku, ne bidimu dikumi ne bìbidi, ne bakwidi balongeshiibwe abu. Kayi muyè ditùkù nànsha dimwè mu kàlaasà, kàdi nànsha nànkù bààkakema lungenyi alu. Nènku tangilààyì . . .

<sup>75</sup> Yéyè uvwa Dìyì. PààkalediibwaYè, Ùvwa Dìyì. Ùcìdi ànu Dìyì. Monààyi, Dìyì kadyàkwitabakù cintu citentula to. Yéyè ne: "Mêmè ne tatw'Ebè tudi baKukebe ne binsonji."

<sup>76</sup> Yéyè ne: "Kwêna mumanye ne Ndi ne cyà kwikala mudifile ku maalu a Taatù Wanyì anyi?"

<sup>77</sup> Kutandishaye mamw'Endè Sungasunga? Bwà cinyi? Ùvwa Dìyì. Kuvwa mwà kwikala lukonko mu meeji à muntu kampànda, pàvvà Mâriya ewu, wâkamba musangu kampànda ne "Nyumà Mwîmpè" mmumubwikile ne mundidimbi ne kulelaye Mwânà wa balùme, ne pashiishe kubiikila Yòzefù apa ne ki taatù. Dìyì kadyèna mwa kupangilaku to. Kadyèna mwà kupangilaku to.

<sup>78</sup> "Kanwena bamanye ne bivwa bikèngela Mêmè kwikala mudifile ku maalu a Taatù Wanyì anyi?" Ne Ùvwa mudifile ku maalu a Taatù; kí—kí nku à Yòzefù, wenza biibi ne—ne midimu ya dikoona mabaya to. Ùvwa mudifile ku maalu a Tatw'Endè, ùlongolola cidiìdì cyà ntèndeleelu cìvwàbo naaci mu ditùkù adi adi. "Kanwèna bamanye ne Ndi ne cyà kwikala mudifile ku maalu à Taatù Wanyì anyi?" Eyowa's, mukalenge.

<sup>79</sup> Bantu bààbûngì leelù ewu, mu yàbûngì ya ku èkèleeyiyà milenga eyi, nebàbwélé mu nsangilu wa èkèleeyiyà awu; kí ne "nebàbwélému" to, bàkaadimu. Mbamòne ne aci ke cintu cyà dyenza menemene: "Mu bulunda, bulenga, katwèna mwà kudisanga bônsò bwà cinyi?" Mona's, s'mbateeta, bônsò, munda mwà bidimu, bwà kuvwija ba-Méthodistes bônsò ba-Baptistes, ne ba-Baptistes bônsò ba-Presbytériens; Beena Mpenta mbateete bwà kubavwija bônsò abu beena Mpenta. Kanwèna mwà kwenza nànkù to, kàdi nsangilu ki dyandamuna bwènù nwénù. Ki dyandamuna adi's, cidi Bible wàmба ne nebènzè aci, nènku ki cyôci aci menemene cidibo benze. Èkèleeyiyà mmilwe yà buunyàànà, eyowa's, mukalenge, didisanga pamwè ne: "Mbîmpe, twenzààyi bwobùmwè's!"

<sup>80</sup> Bible mmwambe ne: "Mmunyi mùdì bàbìdì mwà kwendela pàmwè pàdibo kabàyì bumvwangane?"

<sup>81</sup> Bamwe bàà ku bôbò Bavila dilediibwa dyà kùdì virgo. Byà pa lukama makumi mwandamukulu byà èkèleeyiyà ya Mishòonyì yìdi yivila dilediibwa dyà kùdì virgo. Ne bàdi bàvila dibatiiza dyà Nyumà Mwîmpè. Bâdi bàvila bimanyinu byà Dilwa Dyèndè,

Bukole bwà dibiika dyà ku lufù. Bâdi bâvila ne Yéyè kêna umwèumwè awu makèèlèlè, leelù, too ne kashidi to. Mmuniyì mûdì mwa kuvila, pàdibì ne Nzambì mmuteèke cimvundu cinènè cyônsò eci pa buloba bwalu mukàjì kampànda wàkeela mpatà ku katùpà kakesè kamwè kàà Dîyì Dyèndè? Sàtaanà uvwa mumwambile Bulelèlè, bônsò pa kuumusha kantu kamwèpele, kâdi ke kantu kààkatwala lutàtù lwônsò alu. Mpindyewu, piikalabi ne màsaamà à mwoyi ônsò aa ne dibungama bìnùkààdi nukungamangana nààbi ebi, mbwalu katùpà kàmwè kààDì kâàkeedibwa mpatà, nudi nwela meeji ne katùpà kakesè kàà mpatà kàdiku mwà kutubweja anyi?

<sup>82</sup> Ki bwà cinyi Yesù ùdi ulwa bwà Virgo mudìlama, mukezuke, muùjibwe têntè ne Nyumà Mwîmpè, ne kàyi wa pa buloba to, kâdi wa Bukole bwà Nzambì. Kaa, mùshindù mwine ùdibi bilenga bilayà bwà kumanya ne kùdiku mùshindù wà kubwela mu Cisùmbù eci's wè! Udi ubwelamu bishi? Kwàkucyenzaku mu didilamika ku bulongolodi to. Neùcyençè paùdì ubàtiijibwe kùdì Nyumà Mwîmpè, mu Mubidi musokome wà Yesù Kilistò, mubìsshìibwe Nendè mu dibìkkà dyà ku lufù, musùùludiibwe ku lufù ne ku mpèkaatù. Ki mùshindù umwèpele ngwôwò awu.

<sup>83</sup> Mîdimà! Mangumba manènè, ne cisùmbù cinènè cyà bantu cîdisanga ne bâteeka mmwenenu yààbo pa Cyôcì aci, nènku aci cîdi cikukùpa cikupingaja ànu mu dikonyangala dyà bwena dìvwàku ku cibangidilu adi's. Kakwenaku ditekemena nànsha dikesè dîbà adi to; wêwè udi muye kujike. Nènku bônsò bâà kudibo mbamweke ànu bu bâdi basaluke ne buunyààna bwà maékèleeyiyà ebu, beela meeji ne Nzambì neikale naabu. “Èè, Bukalenge bwà bidimu cinunu nebùbanga piikkala nsangilu awu mudisangishe yônsò kuntwaku, ne byenzedi byônsò byà bukwàntèndeelu, ne bikwàbo,” ne bâkadiswikamu. Cidibo benza ncinyi? Benza cimfwanyi cyà nyama wa Iwonji, bukole kampànda, kwikalà bônsò bâdi kabàyì beena mangumba, ne bakwàbo, biikala kabàyì mwà kudiswikaku nààbo abu, bâbâkangila pambelu. Tangilààyi ànu cyanàànà numòne ní cyènzeke.

<sup>84</sup> Ndi naaci cifunda kaaba aka, ditùkù mene ditùdì... Mukalenge ngudi mucìndeeje mu cidimu cyà 1933. Kâdi's ki cyôcì ànu menemene mùshindù ùvvaye... mùshindù ùvvàCi cyâmbé, cìlwa ànu mùshindù wùmwèwùmwè awu, mùvvà paapà mwà kuumuka ku Loomo, ne bikwàbo.

<sup>85</sup> Pààbu, s'mbantu bîmpè, kâdi batùpkane. Yòzefù ne Mâriya bâvwa bantu bîmpè, kâdi batùpkane ànu byêtù byà menemene ebi. Kâdi civwa ncinyi? Nzambì kukwata mudimu ne Mwânà wa balùme wa bidimu dikumi ne bibìdì bwà kuleeja ne Dîyì adi didi ne cyà kushààla dikezuke, ànu civwaDi menemene, cyàkambaDi kumpàlampala ne: “Yéyè ûvwa mulediibwe kùdì virgo,” nènku ke civwaYe.

<sup>86</sup> Beela meeji ne Yéyè ùvwa naabo pààkayabo kushààla bà ku maèkèleeziyà apu, ne bikwàbo, kàdi kaCivwa nànku to. Mpindyewu, kàdi bwà Basungula... Mpindyewu, aci mmídímà, ne mvwa mwà kushààlapu bwà dikwàbo díbà dijimà.

<sup>87</sup> Kàdi bwà Basungula, bàà mushinga mukole ne babìikidìibwe, Bansantu bàà Nzambì, ndi nnwambila, cidimu cìlwalwà eci ne: Shalom, ditalala dyà Nzambì!

<sup>88</sup> Díbà ndyédì! Bu ne mvwa mwikaleku kale wàwa kumpàla kwà matùkù àkafùkìibwa dyulu ne buloba awu, ne kutàngila pansi ne kumònà cintu cyônsò mu kaabujima, ne Taatù mungambile ne: “Mmu ditùkù kaayì mûdì mufwànyine kujinga bwà kwikalà ne mwoyi?” Ndi mufwànyine kwamba ne mpindyewu, mpindyewu mene! Díbà ndyódì edi! Edi ndíbà ditàmbe bunène dìkaadìku Èkèleeziyà mubwele, ànu pabwípì menemene ne dilwa dyà Mubàki. Kaa, bìkèngela bwà Èkèleeziyà mulelèlà wà Nzambì udi ne mwoyi ikale mu kapyà, ûlakuka kapyà, ne Bukénkè bwà Èvànjeelìyò bwikale bushindikìibwe munkaci mwàbo. “Juukà ukenke, bwalu Bukénkè bwäfiki kûdì,” Bukénkè bwà ditùkù edi. Yeshààyì nguvwa bukénkè bwà ditùkù dyèndè. Noa nguvwa bukénkè bwà ditùkù dyèndè. Bwà cinyi? Yéyè ùvwa ne Dîyì dimwènèshìibwe. Nènku Èvànjeelìyò, Mèyì à Bible bwà ditùkù edi, ki Bukénkè bwà ditùkù adi’s. Cikondo kaayi cyà butùmbi citùdì ne mwoyi’s wè!

<sup>89</sup> Mpindyewu ne: “dìndà dilenga” mbwena kwamba ne *ditalala*. Mídímà yìdi munkaci mwà kudyungwija. Ncinyi cidiyi yìdyungwijila? Bwà kuleeja Bukénkè. Yeshààyì 60:1: “Juukà ukenke, bwalu bukénkè bwäfiki kûdì.” Ki bwà cinyi ndi mwà kwamba ne: “Shalom,” Bukénkè bwäfiki kûdì, ditalala dyà Nzambì kûdì Mukàjì musungula, kûdì Inábànzà musungula; aba bawwa Nzambì, kumpàla kwà difuka dyà dyulu ne buloba, mubiìkile bwà kupàtuka ne mulongolwele Cyòcì aci abu.

<sup>90</sup> Bakwabo kabààkuCìmònaku to. KabààkuManyaku kantu nànsha kàmwè pa Cyòcì aci to. Bible ngudi mwambe nànku. Ne Yesù mmwàmba ne: “Muntu nànsha umwe kêna mwà kulwa kûNdì pàdì Taatù Wanyi kàyi mumukoke to, dyàmbedi; ne bônsò bâdi Taatù muMpèèshe nebàlwé.” Aci cidi... .

<sup>91</sup> Ki Yudààsà awu mwimane apu, Bukénkè bùkenkela *apa*, kàdi munda mwà mwoyi wendè mùvvwa dimiinu dyà mîdimà. Pààkalwa diteetangana dyà makàndà, mîdimà e kudileejayi.

<sup>92</sup> Ke mukàjì mukesè, nyéyè ewu, mufìlkishìibwe yéyè yônsò, lwà pa mpàla *apa*, kàdi mwìnhì *emu* muvwa dimiinu didyanjila kulongolola. Kàdi pààkalwà Bukénkè, Bwàkatangalaja mîdimà, ne dyakadileeja patòòke. “Twétù tudi bamanye ne Maasiyà ûlwalwa, ne, pààlwà Ye, Yéyè neàtùleejè maalu aa.”

Yesù ne: “Mémè ki Yéyè awu.”

<sup>93</sup> Kadi Yudààsà kuMwela mpatà, pèndè’s nguvwa ne cyà kwikalà wèndela mu Bukénkè. Nwamònù’s, Bukénkè kuulu *eku*

kabwèna ne bwalu to; mBukénkè kwînshì *eku* bùdì ne mushinga. Bukénkè bùdì lwà kuulu *eku* nebwendè mu bwobùmwè, ne bikwàbo byônsò; kàdi pàdì bucole bulelèlè bwà Nzambì bubwela, kabwena mwà kwalukila kùdì dimiinu difwè *edi* to, adi nedìleejiibwe mu dingumba.

<sup>94</sup> Kàdi padiBu lwà kwînshì *eku*, dimiinu dishuwashùwàle, didyanjila kulongolola, pàdì Bukénkè abu bùtùùluka munda emu, bwipata mídimà yônsò mu wêwè, ne bùkubweja mu bwobùmwè ne Kilistò. Yéyè uvwa ng'Ewu Wâkakupèësha Mwoyi kumpàla kwà difuka dyà dyulu ne buloba, bwà cyanàànà kwâdyâkuCimònaku to, ki cìdì Nzambì mwambe.

<sup>95</sup> Mpindyewu, nwêñù Dimiinu didyanjila kulongolola, Shalom! Amen. Ditalala dyà Nzambì diikale pambidi pèènù, bwalu tukààdi pabwípì ne nshiikidilu mpindyewu. Tukààdi ku ndekeelu menemene. Netwâkulè bwa kasùmbù aku, bwà katancì kakesè. Shalom!

<sup>96</sup> Bukénkè bwà Nzambì bwäfikì. Dîyì, Bukénkè, mbushindikiibwe cyàkàbìdì, bwà nwêñù kumònà mamweneshiibwa à mulayì wà Nzambì bwà ditùkù edi. "Kenketaayi Mifundù, mu Yôyi amu mmunùdì nwela meeji ne nudi ne Mwoyi wà Cyendélèlèlè." Yôyi ayi's ki yìdì yìfila bujaadiki bwà ditùkù ditùdi ne mwoyi. Bukénkè bwà ditùkù ncinyi? Cìdi Bible mulaye bwà ditùkù edi ncinyi? Nudi numònà ne ndibà kaayi edi!

<sup>97</sup> Kabyena bikemesha to pààkabàtandisha Yesù bwà dibenga kwitabuuja Yone. Yéyè nguvwa bukénkè, bwalu muprofetà ukaavwa mwambe ne neàlwé. Nènku ke yéyè awu mwaba awu, bukénkè bumwènèshìibwe. Kabavwa babùmone to. Kabavwa babuumvwa to; kwelabo meeji ne yéyè nguvwa Maasiyà awu, ne kwelabo meeji ne ncintu kampànda cikwàbo, anyi *cikansanga* cikwàbo. Bâàkapanga kuCimona.

Yesù wàkalwa. Makénkè àbìdì kaèna mwà kukenkesha musangu wùmwèwùmwè awu to.

<sup>98</sup> Kakwèna mwà kwikala bukénkè bwà èkèleeziyà ne Bukénkè bwà Nzambì bùkenka musangu wùmwèwùmwè awu to. Bìkèngela ciìkàle Bukénkè bwà Nzambì bwikale buumusha bukénkè bwà èkèleeziyà. Ne ke cìdi menemene munkaci mwà kwenzeka leelù ewu. Nzambì ùdi munkaci mwà kutàpùlula bwena èkèleeziya ne Bukénkè Bwèndè bwà Dîyì dilaya dyà dîbà ditùdi ne mwoyi edi. Aci's m'Bulelèlè, mulunda wanyi. Udi mufwànyine kwikala kuyi muswè kwitabuuja aci to, kàdi wêwè indila ànu cyanàànà kadi ujandule ne mmwômò anyi kî mmwômò. Kwindidi to, mbîmpè ubwele mpindyewu mene pàcìdiku mpùngà wa kubwelamu apa.

<sup>99</sup> Dîyì dìdi Bukénkè pàdìDi dishindikiibwe. Pàdì ànu Dîyì, dilayè bwà ditùkù, kadiyi dishindikiibwe to, dîbà adi kî m'Bukénkè to. Kadyèna mwà kwikala nànku to. Piìkalabi

ne Nzambì wàkamba ne: “Bukénkè bwìkalèku,” ne kakùyi díbà nànscha dimwe dimwènèshiìbwé to, kakwèna cimanyinu cyà bukénkè nànscha. Kàdi pààkamba Nzambì ne: “Bukénkè bwìkalèku,” ne bukénkè kwikalabuku. Pààkalaya Nzambi Maasiyà, Maasiyà kulwa, díbà adi Díyi Dyèndè kuuladi ne Yéyè uvwa Bukénkè bwà díbà adi. Pààkalaya Ye Noa, ne kulaya Ye bakwaàbo, ànu nànsku, bàwwa bukénkè bwà díbà adi.

<sup>100</sup> Nènku kùdi Bukénkè bwà díbà edi leelù ewu, n’Yesù Kilistò mu bukole bwà dibììka Dyèndè dyà ku lufù, Díyi Dyèndè dìdì dilayììbwé bwà ditùkù edi. “Byenzedi bìndì Mémè ngenza, nenùbyéñzè pèènù; nenwéñzè binène bipite ebi, bwalu Nyààya kùdì Taatù.” Byenzedi binène bitambe, bintu bitambe byakenza Ye bunène? Nudi nuciìtabuuja anyi? Mémè ndi nciìtabuuja. Bidi bìmweka bipwekèle. Bidi bìmweka bu bidi bipìcila bantu pa mitù. Tangilààyì pavwa Ye pa buloba apa, mmunyi munudiku mwà kwenza byenzedi “bitambe” bunène? Ndi mucikùdímùne, misangu yàbùngì ne, “bipite bùngì,” kàdi byà mwômùmwè. “Bitambe bunène,” mwàkambà Ye mu Yone Munsantu 14:12 ne: “nenwéñze byenzedi binène bitàmbe ebi.”

<sup>101</sup> Nukààvwaku bamònè? Pààkakudimuna Ye mâyì mvinyo, Wàkangata mâyì, dyàmbedi; cintu cimana kufuka, e kucikudimuna mvinyo. Pààkadììsha Ye bantu binunu bitaanu apu, Wàkangata mushipa wùvvàku musangu kampànda wòwèla mu mâyì, kuwùcibula, kuwàbanyayè, e kuvudija bufùki. Kwangata Ye dyâmpà divwa musangu kampànda blé, mwosha mwenza dyâmpà, kudicibula ne kudyàbànyinaye ba... kudipèëshaye bantu, ne kwalukiladi kàbìdì. Uvudija bufùki’s!

<sup>102</sup> Kadi mu matùkù a ndekeelu, mùdìku kakùyi cimanyinu cyà bufùki to, Yéyè ùdi wàkula ùcìtwala mu bufùki, nànscha byà munyi, bileeja ne n’Nzambì umwèumwè uvwa ku cibangidilu awu. Yéyè ùdi mwà kufuka nshindì, Üdi mwà kufuka cyônsò cidi Ye muswè kwenza aci, bwalu Üdi Nzambì. “Nenwéñzè bintu binène kutàmba ebi, bwalu Ndi nya ku Taatù Wanyì.” Díyi kadyèna mwà kupangilaku to, ne bikengela Dyôdì dimwèneshiìbwé ne bikengela dyûlè. “Nenwéñzè binènè bipite ebi,” kabiyì divudija to, kàdi ditwala mu bufùki ku dyakula.

<sup>103</sup> Monaayi Díyi mpindyewu pààkalaya Ye. Mpenyi, mpenyi patukààdi, díbà adi’s? Tudi ne mwoyi mu ditùkù kaayi’s? Díbà didi cinyi? Dimwenesha dyà Díyi dyà Nzambì, ànu mùdìdi mu mèbà ônsò. Nudi ne Mukenji pa Bikondo Mwandamutekètè Byà Èkèleëziyà. Tangilààyì ànu menemene mùdi yônsò wa ku nyama ayi wákapátuka, ne Nyama yákayilonda ayi. Tangilààyì ní kabyena ànu binwangane mu cikondo cyà balongolodi, ne cikondo cyônsò, ànu menemene muvvàci ne cyà kwikala, menemene civwà Díyi dyâmbé. Nènku ki mwàmwenesha Nyumà Mwîmpè leelù ewu ànu menemene cidi Bible mwambe ne necyènzekè aci.

<sup>104</sup> Tudi tumona mundìdimbi mu maulu ne pa buloba, ne bintu byônsò, ne nsangilu ne bikwàbo byènda bìdilongolola.

<sup>105</sup> Nènku tudi tumona, munkaci mwà biine byônsò abi, Èvànjeeliyò wa butumbi wa Yesù Kilistò, mulaya bwà ditùkù edi, ùDimwenesha. Tudi ne mwoyi mu cikondo cilenga cyà dikema. Shalom nwènù badi ne Dîyì munda mwà mwoyi wènù, basungula kumpàla kwà difuka dyà dyulu ne buloba, bwà kutèeleja Dîyì bwà ditùkù edi. Kabiyi nànku bwèbè wèwè to, ncidimu cibi bwèbè wèwè kumpàla eku. Pawikala musungudiìbwé nànku, mbuloba bunènè bwèbè wèwè kumpàla eku, anyi ditùkù dinène, cidimu cinène cìlwalwà mpindyewu eci, cidimu cipyacipyà.

<sup>106</sup> Ki nkubilekela bipweeka ne mâyi to; bantu bààbûngì batu bateeta babilekela bipweeka ne mâyi mu cidimu cipyacipyà, kubyàluja ditùkù dìdì dilondà.

<sup>107</sup> Byenze bu kaabwalu kakesè kâmvwà mbala mu dìndà kampànda. Mukàjì kampànda wela bayèndè lubila, uvwa mujuuke pa bwebwebwe mupatuke ne mukangate cibejibeji cyà dìndà, nènku mwikale ubalangana ne cibejibeji cyà dìndà aci. Kwambaye ne... Mukàjì kwambayè ne: “Kudiku bupyabùpyà mu nguumu anyi?”

Yéyè ne: “To, ànu bintu bìmwèbìmwè abi, cibi bantu bakwàbo.”

<sup>108</sup> Ki mùshindù ùdibi leelù ewu awu, cintu cìmwècìmwè aci. Tudi ne bulongolodi bupyabùpyà, dilongesha ànu dìmwèdìmwè dyà kale adi; ànu kucisekenkeja eku ne eku, muntu kampànda ne kaammwenenu kààci kaya mu *nùnku* anyi mu *nàka*.

<sup>109</sup> Edi nditùkù dipyadipyà. Àlèluuyàh! Edi nditùkù dìdi dikengela twêtù kujuuka ne kukenka, mu Bukolè bwà Yesù Kilistò. Mídimà ya mupimbu yìdi yìlwa pa buloba; s'bivwa bìkèngela bwà kwikalaku ditùkù dipyadipyà bwètù twêtù, éyowà's, cyà bushùwà, tucyènza ànu mudi Ye ùcyènza amu. Kàdi kudimukila ku Dîyì Dyèndè bwà kumona mulayì ùdi mulayìibwe bwà ditùkù edi, dìbà adi neùmanye ne udi ne mwoyi mu Bukénkè bwà ditùkù anyi to. Kushintulula kabala matùkù kî nkushintulula cikondo to; cidi ànu kushintulula kabala matùkù cyanàànà.

<sup>110</sup> Mpindyewu ne ntema yônsò tèèlejààyì. Enzaayi mwàkenzà Davìdì amu, tèèkaayi matùkù ènù àcìlwalwà mu cyanza Cyèndè. “Mmunyi? Mmunyi mûndì mwà kumanya cyà dyenza, Mwanèètù Branham?” Tèèka matùkù èbè àcìlwalwà mu cyanza Cyèndè. Ní ncinyi cyônsò cyàlwà aci; mweyemene Yéyè. Yéyè ùdi Dîyì, mpindyewu manyààyì. Davìdì wàkamba ne: “Cikondo cyèndè cidi mu cyanza Cyànyì. Mweyèmene Yéyè dìbà dyônsò. Ikala misangu yônsò ànu muMweyèmene” Ùvwa mumanye Ewu uvwa mulame matùkù àcìlwalwà, Davìdì ùvwa mumanye, ki bwà cinyi ùvwa mwà kwamba nànku. Kudi ànu Umwèepele udi mulame

matùkù àcìlwalwà, n'Nzambì. Pa nànku, Yéyè ngudi mulame ma—matùkù àcìlwalwà, lekela Yéyè àkukwàtè. Eyo.

<sup>111</sup> Bamwè bantu batu bàmba ne: “Kadi, Mwanèètù Branham, mêmè's nkààtu muteetètètè.”

<sup>112</sup> Kadi anji indilààyi kakesè. Lutuulu mbukolè. Lutuulu mbukolè bwà Nyumà Mwímpè. “Aba bàdì bindila Mukalenge nebàvwijulule makàndà abo mapyamàpyà.”

<sup>113</sup> Wéwè udi wamba ne: “Mmunyi mündì mwà kwindila kàbìdi ntanta?” Tungunuka ànu ne kwindila. Paùkààdi mumane kwenza cyônsò cyûdì mwà kwenza bwa kushààla mwimane, dìbà adi imana, wamònù's, imana ànu cyanàànà. “Mmunyi mungààcyenza's?” Imana! Yéyè mmwambe ne m'Bulelèlà, ne m'Bulelèlà. Mmwambe ne necyèenzeke. “Munyi?” Ncyêna mumanye to; kàdi necyèenzeke. Yéyè ngudi mwambe nànku. Yéyè ngudi mucilayè. Piìkalabi ne Yéyè ngudi mucilayè, necyèenzeke. Kwajiki. Kacyêna mwà kunyanguka to.

<sup>114</sup> Nànku mpindyewu vùlukààyì ànu ne, Nzambì wakangata binunu ne binunu byà bidimu bwà kuuja mulayi Wèndè wa Musungidi uvwa ne cyà kulwa. Bidimu binunu binaayi, Nzambì kwangata bwà kûja mulayì awu. Kadi Yéyè uvwa mumanye, kubangila ànu ku cibangidilu aku, dìbà menemene divwaci ne cyà kwenzeka. Ùvwa mumanye; muntu mukwàbo nànsha umwe kavwa mumanye to. Ùvwa mwambe ànu ne necyèenzeke. Nènku pààkenzekaci, bantu bavwa mu cibwejàkàjì dyà kacya, mu mùshindù wà ne kabààkamanya mwà kuciitaba nànsha. Cintu cimwècimwè aci's necyèenzeke kàbìdi's! Cìtu misangu yônsò ànu cyenzeka, kacìtu cipangila nànsha, nseke yônsò yìbìdì, misangu yônsò.

<sup>115</sup> Cyàkenza Ye munda mwà bidimu ebi ncinyi? Wàkaleeja cimfwànyi cyà Yéyè ulwa.

<sup>116</sup> Wàkacileeja mu Yòzefù. Bu nwènù mwà kutangila nsòmbelu wa Yòzefù; mukìna kùdì bânà bààbò, munanga kùdì tatwèndè. Bwà cinyi? Bwalu yéyè uvwa wa nyumà, bwalu wàkamona bikèènà-kumònà. Bakwàbo kabàvvwa bamònà bìkèènà-kumònà to; bàvvwa bankambwa kàdi kabàvvwa bamònà bìkèènà-kumònà to, kuumvwija bilòòtà. Kadi bààkamuumvwila mukawu. Nènku bààkamusumbisha ku binjànjà byà mfranga bitwe ku makumi àsàtù, kupatukaye mu ciina muvvwaye ne cyà kwikale mushipiibwa amu, kusòmbaye ku dyàbalume dyà Pálò. Nènku pàvvwàye ùjuuka mu nkwasà wa butùmbi, mpungi uvwa ùdila ne: “Twayi cinù pânhì; Yòzefù nyéyè awu ùlwà!”

<sup>117</sup> Ànu menemene cyàkenzà Yesù, mùsòmba ku dyàbalume dyà Nzambì. Nènku pàdi Ye ujuuka mu Nkwasa wa butùmbi, mpungi neyìdile. Ne cinù cyônsò necìtwe pânhì, ne cijikula Yesù Kilistò, Mwâñà wa Nzambì. Menemene's.

<sup>118</sup> Wàkacileeja mu bifwanyikijilu byà Davidi, pàvvwàye kuulu pa... mfùmù mubengìibwe ùbandila Yélusàlémà, ùdila mwadi.

"Mmisangu bûngì kaayi îngààkaswà kukukungwija, mudi nzòòlo ukungwija twânà twèndè, kàdi wêwè kwakaswa to."

<sup>119</sup> Munda mwà bikondo, Yêyè kucileeja mu bifwaànyikijilu, mumanye ne dîngà ditùkù cimfwanyi cyà ndekeelu necyûlè, ne dimweneshiibwa mu kaabujima dyà Maasiyà Wendè mulaya nedikaleku. Nènku pààkalwa mulayi mu kaabujimà, nànsha muvwaYe muwùfwanyikije... Ku ditùkù ne ku ditùkù, ku cidimu ne ku cidimu, Ùvwa uwùfwanyikija. Nènku pààkafikabi ku bulelèlè, kabààkaciitabuujaku to.

<sup>120</sup> Yéyè mmwenza cintu cìmwècìmwè aci, mucifwanyikije, ne mucileejé mu bikondo byà èkèleeziyà, ne bikwabo byônsò, too ne ku dîbà ditùdì ne mwoyi edi, kadi bantu bàdi mu mîdimà ya mupimbu, mbimweke ànu bu ne kabèna mwà kucyùmvwaku to. Cintu cyà dibungama be!

<sup>121</sup> Anu mùdibi pa kumònà nsongààlùmè mwab'ewu, mwímpè, munène, muntu mupàyàme ne nsuki yêndè, yìdiye mwenze mvwangala mütù bakajì benza amu, muvwale diyô, ne mupilu bulewù mulembelele, ne bisabaata byà violet ku makàsà. Mmulùmè anyi? Kaa, ekèlekèle, ncintu cyà cyenza bwôwà kaayi bwà kucibiikila ne mmuntu mulùmè's! Ncintu kaayi cyà kubiikila ne mmuntu's we! Neyà bushuwa's.

<sup>122</sup> Kumònà mukajì kampànda, uvwa ne cyà kwikala mulenga ne mukezu ke awu, ùpatuka pambelu muvvâle mùpanù wà muntu mulùmè, muci wà mfwanka ku mishiku, ne nsuki mibèbula. Cintu kaayi cyà kubiikila ne mmukajì's! Yesù wàkabiikila Mariyà ne, "mukajì." Kabivwà nànsha bikengela àbikidiibwe nànku to; ànu cikajì.

<sup>123</sup> Monààyi, nènku dîbà! Bwà cinyi? Misangu mikwàbò bantu bàdi balaka mukana ne beela meeji ne bàdi ne meeji matòòke abu, kadi mîdimà ya mupimbu mmibabucikile mu cyôcì eci. Bible mmwambe ne nebiiikalè nànku. Balààyi Yeshààyì 6 bwa kujandula ne bakajì ní kabavwakù ne cyà kwenza mùshindù awu mu matùkù a ndekeelu, ànu menemene cyàkamba Bible ne ki ciikalabo. N'Dîyì dyà Nzambì. Yelèmìyà ne bakwàbò bashìlèshìllàngànè bààkaakula bwà dîbà ditùdì ne mwoyi mpindyewu edi, bwalu bààkamònà ndekeelu kacya ku cibangidilu. Ke patùd tumònà bintu ebi, ne mîdimà yà mupimbu pa cisàmbà.

<sup>124</sup> Èyowà, byàkangata Nzambì binunu byà bidimu, bààkùpa... bileeja bifwanyikijilu ne bikwàbò byônsò, kàdi ndekeelu wa byônsò kabààka Mumanya pààkalwa Ye to, nànsha muvwaYe mulejìlbwe mu cimfwanyi mu Yozefù ne Davìdì ne Eliyà, ne mu bônsò amu. Yéyè wàkaleejiibwa mu cimfwanyi kudibò, kàdi pèètù katwena mwà kuumwà ne bwà cinyi kabàvwa baCimònà to. Nènku ke cyôcì aci, ànu mu Mifundu menemene ne: "Mu Betèlèhèmà wa Yudaayà," Yéyè ùvwa mwà kulediibwa. Tudi tusangana ne mu Mifundu, mùshindù ùvvàYe ne cyà kulediibwa,

virgo. "Virgo neimite difù ne neàlele Mwânà, ne babìikila Dînà Dyèndè Emanùwèlè."

<sup>125</sup> Bwà cinyi bààkaMushipa? "Bwalu Yéyè wàkaDivwija Nzambì," Pende ùvwa Nzambì. Cyà bushùwà, bàdi bacììtaba. "Yéyè wàkamba mùdìYe uDivwija Nzambì, mwikàle mwomùmwè ne Nzambì, wàmба ne: 'Mêmè ndi Mwânà wa Nzambì.'" Mona's, ki civwaYe!

<sup>126</sup> Bible mmwambè ne Ùvwa ne cyà kubìkidiibwa ne: "Mubedyanganyi, Mfùmù wa Ditalala, Nzambì wa bukolè, Taatù wa kashidi, Mukèmeshyanganyi!" Ki civwaYe ncyòcì aci. Bwà cinyi kabavwa bumvwa ciine aci?

Kabyèna bikemesha to pààkambaYe ne: "Bivwa bìkèngela bwà nwénù kukenketa Mifundu."

Bôbò ne: "Twêtù tudi bayiidi bàà Môsà."

<sup>127</sup> Yéyè ne: "Bu ne nuvwa bayiidi bàà Môsà, nuvwa mwà kummanyà Mêmè. Môsà ngwâkafunda bwà bwalu Bwànyì." Kadi bôbò kabààkacimanya to.

<sup>128</sup> Ne díbà dikaadi cyàkàbìdì pa bantu, dyàyàbò ku twitabààyì yàbò ne bikwàbò, pamutu pàà Yesù mulenga awu. Ncyà bushùwà. Bintu binènè bìdì byenda bijuuka ebi, nènku bidi munkaci mwà kutàmba kubinyija buludi mu mìdimà ne mìdimà mitàmbe. Nènku Nzambì ùcyamba patòòkè mu Díyi Dyèndè, ku bimanyinu ne maalu à kukèma mu maulu, ne udyanjila kuleeja, wamba maalu àdì enzeka ànu menemene pa díbà ne mu kasunsa, bivwa ne cyà kwenzeka abi. Ne pashìshe mbatùngùnùke ànu ne kwenda kuya mu mùshindù ùmwèùmwè awu. Mbyenze ànu bu ne kabèna ànu mwà kupanga kucyenza to. Bantu bìmpè, èyowà's, mukalenge, benza cintu cìmwècìmwè aci mpindyewu ànu mwàkacyenzabo musangu awu amu.

<sup>129</sup> Tudi bifùkììbwà byà cikondo. Nzambì ùdi bifùkììbwà byà Cyendèlèèlè... Nzambì ùdi cifùkììbwà cyà Cyendèlèèlè. Kacya Yéyè kààkabangaku to ne Yéyè kààdyàkwikalaku ne ndekeelu to. Pa nànku bwà cinyi kubenga ànu kudììlambula kudiYe? Bandulukààyì, nukènké ne disànska dyà Bukénkè bwà Díyi dyà Nzambì bùdì bùteemà leelù ewu ebu. Bantu kabènaku mwà kumònà Cyòcì aci bwà cinyi, balunda bàànyì?

<sup>130</sup> Tèèlejààyì, mêmè ndi mwanèènù. Ndi mununange. Kí mbifwanyineku kwikalà bipèèpele bikolè bwànyì bwà kutwala cyanàànà, piinaapù, uya kumpàla wamba ne: "Kaa, èè, mêmè's nêndyè cibàngà pa Cyòcì eci, nênd-..."? Aci kacitu mu mêmè to. To, mukalenge. Pàdìbi ne n'Díyi, n'Díyi's. Nzambì atùkwacisheku bwà kwimanyina cintu cìdì cilelèlè aci! Èyowà's, mukalenge. Mbifwanyine kwikalà bìmpè, cyà bushùwà, udi mufwanyine kutamba kutuuciibwa tuumapi paanyimà. Kàdi ncinyi cìndì, cingiikala mwà kwenza pangimana Ditùkù adi piìkala minu minyanùnùke ayi yimfunkune mu mpàla yàmba

ne: "S'uvwa mumanye cìdì címpè, kadi's wàkapangila bwà kutwàmbila"? Yoyoyo! To!

<sup>131</sup> Nêngìikalè bu Pôlò ne: "Ncyéna mudikande bwà kunwambila Mubelu wônsò wà Nzambì to." Mashi à muntu nànscha umwe kaènà pambidi pàànyì to. Lekèlaayi Mubelu awu uye kwônsò kùdiwu mwà kuya aku. Aci's mBulelèlè. Nzambì mmucimanye, ne Ùdi ucítwa nyama ku mikolo wàmba ne m'Bulelèlè.

<sup>132</sup> Kukùdimuka kutàngìla ku cinyi, kùdi Mwanèètù Branham anyi? Wêwè, udi mufwanyine kwikalà mukùtakàne wêwè mwenze cintu bu nànkú awu. Kukùdimuka kutàngìla kùdi Kilistò, ne Yéyè udi Dîyì! Kudimukila kùdi Kilistò!

<sup>133</sup> Umuka ku twitabààyi! Alukila mu...Kî mbwalu to, udi mufwanyine kwikalà mubange twitabààyi webè, kukaadi bidimu nkama yitaanu, mûdì ànu...Aci kacyéna ne mushinga nànscha mukesè ku mêsù kwà Nzambì to. Basàdoka ne Bâfaalesa abu bâàkabanga ntanta mule kumpàla kwèbè, ne bâàkapìshiibwa.

<sup>134</sup> Kaa, udi ukeba kuteeka cileeji cyèbè cyà Nyumà Mwîmpè pa byenzedi bishìllèshìllèngane. Mêmè ndi ngiitabuuja dimwèneshiibwa dyà Nyumà Mwîmpè. Cìdi cyènza cinyi? Beena Mpenta bâdi bàmba ne: "Dyakula dyà mu myakulu's ki cileeji cyà mbangilu cyà Nyumà Mwîmpè." Nkaadiku mumòne balozi bakàjì ne balozi balùmè bâàkula mu myakulu. Nkaadi mubàmòne bâàkula mu myakulu ne banwína mashi mu kabalubalu kàà mutù wà muntu, ne bàmba ciprofeta kàdi bavila ne bwà cintu pààcì ne n'Nzambì kacítuku to. Nkaadikù tuyè mu bitùndilu byà balozi mudibo batèèka kediyô pa mèèsà ne bamufikisha ku ditùmpika uya muulu walukila, ne ufunda mu myakulu myenyi ne uyandamuna. Ncyà bushùwà. Aci kacyéna ne cintu nànscha cimwè cyà... Nànscha nànkú, ndi ngiitabuuja ne Nzambì ùtu wakula mu myakulu myenyi ku bantu Bèndè. Kadi nwénù nudi nutàmبا kushindameena pôpô apu ne: "Mbwà cinyi bidi bìkèngela ne kwikale mwandamunyi? Mbwà cinyi bivwa bìkèngela kwikalaci mukenji bwà èkèleeyìyà?"

<sup>135</sup> Pashìlshe nwénù bantu bakwàbò, nudi nwamba ne: "Mamuma a Nyumà, ke mutùdì tumanya. Dinanga, disànkà, ke mutùdì bapete cileeji." Mmwômò anyi? Dîbà adi Science Chrétienne s'ùdi unufinyina bônsò panshi. Bâdi bâdìibidija naaci bikolè kunùtàmبا nwénù bônsò beena Mpenta, ba-Méthodistes, ne ba-Baptistes, basangisha pàmwè.

<sup>136</sup> Tangilààyi numòne cìdì cyènzechka. Lekelaayi nnuleeje mamuma à Nyumà, bwà numòne ní nudiku mwà kwakula kàbidi bwà bwalu abu. Twangatààyi Yesù. Nzambì amfwileku luse bwà mèyi angàmbà àà; mêmè nênganjì kuMukoma nyimà bwà katancì kakesè, bwà kunùleeja ne, angataayi nsangilu wa bantu

ewu mwaba ewu, ne nsangilu wa bantu ewu mu mapingaja emu. Nêngämbè . . .

<sup>137</sup> “Bakalenge, kudi Nsongààlùme mu nyungulukilu emu, Dînà nè Yesù wa mu Nazàlèètâ, kanuMulondiku nànsha! Uvwa dyàmbedi. . . Cìdì Bible wetù ewu utùlongesha ncinyi? Nzambì ùdi dinanga. Nganyi wa nzanzanza uvwa neebè pawàkalediibwa? Nsacerdòsè webè wa kale, wa musàangeelu awu. Ncyà bushùwà. Nganyi wakalwa kûdì paùvwa mu lutàtu, kuyi nànsha dyéyà, ne kukusombesha ndambu wa mfranga? Nsacerdòsè webè wa kale, wa musàangeelu awu. Menemene. Wâkakwela dibòkò dyèndè ku nshingu ne ku nshingu wa mamwèbè, panùkààvwà nwamba kushiyangana, ne kukusambidila ne kukwaluja kûdì Nzambì? Nsacerdòsè webè wa kale, wa musàangeelu awu awu. Nganyi wakiimana ku luseke lwèbè, paùvwa wêwè ne mutumba wèbè mu makokyanganyi, ne kunwaluja pàmwè mu bwobùmwè awu? S’nsacerdòsè webè wa kale, wa musàangeelu awu. S’ncyà bushùwà. Nganyi mwine’s, wâmba mêtì à ndekeelu pa wêwè ku ditùkù adi? Nganyi mwine awu? S’bàdì bakushiya mwaba awu ubola; kàdì nsacerdòsè webè wa kale, wa musàangeelu awu ùdi ûlwa ùkubènesha, ne ukutuma pàmwè ne Dîyì dyà Nzambì. S’nsacerdòsè webè wa kale, wa musàangeelu awu!

<sup>138</sup> “Kadi bishi bwà Mulumyana ewu udibo babìikila ne n’Yesù wa mu Nazàlèètâ ewu, dîbà adi, wamònù’s, m’Mupatukile mu cilongelu kaayi? Byàkakèngela bwà nsacerdòsè webè wa kale, wa musàangeelu awu kudifilaye, matùkù èndè ônsò à mwoyi. Kakwèndè mulùme uvwa mwakwidi. Tatwèndè wa tatwèndè wa tatwèndè wa tatwèndè wa tatwèndè wa kakwèndè mulùme uvwa mwakwidi. Wâkafila cyèndè cikondo cyônsò nkòòng mu bulongolodi emu. Mmulongeshiibwe ku Dîyì; mmumanye cidiye wàmba aci.”

<sup>139</sup> Mpindyewu tudi twakula bwà mamuma à Nyumà: musàangeelu, dinanga, disànkà, ditalala, dyumvwa, mwoyi mule, lutuulu, nwamònù’s, mamuma à Nyumà.

<sup>140</sup> “Ambaaku tumòne bwà mwine Yesù ewu, m’Mufumine penyi? Katùtukù banji kuumvwaku munungànyì wà ne m’Mupatukileku ne mmu cilongelu kaayi to. Wèndè wônsò ùdi ànu wà kuteeta kusunsula bilongelu bitùkààdì biibàkè ebi’s.” Kakuyi mamuma à Nyumà mwab’awu to, mmwômò anyi?

<sup>141</sup> “Cyàkenzà Ye ncinyi kuntu kwàka kùvvà bangèndààmùshingà bakwate ne byà luse abu, ne beena kantu-ku-byanza abu ne cyà. . . Bôbò, bôbò kabatu ne bayààkumuna mìkòòkò, nànkú bôbò—bôbò mbenze kaacikùmbi kakesè pambelu apu bwà muntu wàmòna mwà kutwàlamù mùkòòkò. Mwena kantu-ku-byanza mukwate ne byà luse awu, yéyè—yéyè mmuswe kulambula mùkòòkò, bwalu mushingà wà Nzambì. Ùdi ûlwa ne mù—mùkòòkò, bwà kusumbisha mwena kantu-ku-

byanza, bwà wamònà mwà kulambula bwà musùùkà wèndè. Cyàkenza Yesù wenù wa ku Nazàlètè ewu ncinyi's? Kuntonkola mèèsà èndè; kwangata ndambu wa biseba e kubilukakaja, kwela bakwidi abu mfimbu kubapatula; ne kwamba mùdì nsacerdòsè webè wa kale, wa musàngeelu awu, ‘nyòka mu mashìndè; mwena lubombo!’”

<sup>142</sup> Mpindyewu nwènù nudi nubìikila aci ne mmamuma à Nyumà amba's? Nànscha kakesè. Dîbà adi mamuma ènù miine à Nyumà awu adi akashààdila penyi? Ànu munùdì kàbìdì nwela meeji ku dyumvwilangana dyà luse, ne Yéyè kupicila munkaci mwà musùmbà wà bantu amu, mintùtà myadija, mpofo, bikalaba, beena ntàtu, beena bidimba byuminyine, bilemenda, ne kacya kàyikù ondopa nànscha umwe wa kùdibo to; mûle têntè ne dyumvwilangana dyà luse's. Bantu bàà meeji à musunya kabààkuCimanyaku nànscha. Maasémìnèrè kaàtu aCilongesha to. Ndibuulula. Bushùwà's. Mamuma à Nyumà adi ashààdila apu's, kî mmwômò to? Baakwidi abu bavwa ne mamuma à Nyumà misangu dikumi.

<sup>143</sup> Mmunyi mùdì mufwànyine kumanya cìdi cyà bushùwà? Dimwèneshiibwa dyà Dîyì dyakula dyà Nzambì diikale dimwènèshìibwe, Bukénkè bwà dîbà adi. Cyà bushùwà's. Ki cileeji cyà Nyumà Mwímpè neyôci aci, kwitabuuja Dîyì dyà Nzambì padìDi dimwènèshìibwe. Yéyè uvwa Dîyì, dimwènèshìibwe. Ki bàmwè kuDivilabo, kuDisekabo, kuMwelulwilabo ne kuMubiikilabo ne—ne mmwena lubùku, nyumà kampànda mubi; kùdi cileeji, cyà dyakula dyà mu myakulu, kùdi cileeji cyà mamuma. Cileeji cimwèpele cìdìku, mpàdì muntu witabuuja Dîyì difunda. PadìDi dishìndìkìibwè, wèndela mu Bukénkè bwàDì. Yesù ùvwa Bukénkè bwà dîbà adi bwalu Yéyè nguvwa Dîyì dilaya dyà dîbà adi, ne ùteeta bwà kubambilà nànkù, kadi bàvwa batàmbe—batambe kwikala mu mîdimà bwà kuDyumvwa. Ki mudibi kàbìdì, leelù ewu, patùdì twakulangana apa.

<sup>144</sup> Mpindyewu bifukiibwa byà cikondo, ki citùdì's. Lambulaa njila yèbè kudiYe, nènku Yéyè neènze ne matùkù àcìlwalwà ikale mîmpè, bwalu tudi tuMumònà ànu mudiYe mu Dîyì amu.

<sup>145</sup> Nwènù's nukààdi baMumònà ushindika Dîyì dilaya dyà leelù. Nudi nucìmònà mu bimanyinu mu ngondo. Nudi nucìmònà mu maèkèleeziyà. Vùlukààyi.

<sup>146</sup> “Wèwè wàmbi ne: ‘mu èkèleeziyà,’ aci cìdi ne bwalu kaayi ne èkèleeziyà?”

<sup>147</sup> Indìlaayi kakesè. Ngondo ùdi ùleeja èkèleeziyà. Yelusàlèmà s'ki cimenga cyà èkèleeziyà citàmbe kumanyika cyà kale ne kalèèlè pa buloba. Melekisedekè mmufùmine ku cimenga aci; Mfùmù wa Salémà, Mfùmù wa ditalala, Mfùmù wa Yelusàlèmà. Ncyà bushùwà, cimenga cyà citambè kwikala cyà kale pa buloba. Ne ciine aci civwa nngondo, bu mwaba wàkatèèkiibwa

mikenji, kadi ki divwala dyà mîdimà ya bàà Bisàmbà byà bendè dilwalwà kucìbwikila edi. Yéyè kwamba ne: “È—ekèleeyìyà’s neàdyatakajè bimanu byà Yelusàlémà too ne pààkajikà cipungu cyà bàà Bisàmbà byà bendè.” Kadi’s ki yéyè ewu. Twêtù’s tudi ne mwoyi ànu mwômò amu. Ùdi munkaci mwà kwalukila buludi, cyà bushuwà menemene ànu mùdì dînà dyànyì ne ng’William Branham amu. Èyowà’s, mukalenge, tudi mwà kucimònà. Yéyè mmubwikila kùdì mundidimbì, mudyànjila kuleeja mu mundidimbì, mudyànjila kwamba; ùbiìkila Basungula bwa kupàtukabù. Bavwa bàbaabacila ànu mu mîdimà, bakwàbò bààbò, padibo benda haya apu. Èyo.

<sup>148</sup> Mpindyewu tudi tumòna Dîyì Dyèndè dishindika. Tudi twitabuuya. Nànkú awu piìkala Yé mushìndìka Dîyì dyà leelù, cìdìDi, cìndì mwà kuditàcishila bwà cìdì cidimu citwala ncinyi’s? Cîndì mwà kuditacishila bwà cidimu cilwalwà ncinyi’s? Cîndì nditacishila ní ndi ne mwoyi leelù anyi ndi mfwa leelù ewu ncinyi? Dîyì dyônsò dyàkalaya Ye nedishindikiibwè, ku dimwè ku dimwè! Piìkala Yé ne bukolè bwà kucyènza leelù ewu, paanyimà pàà mumane kucìlaya kukaadi bidimu binunu bìbìdì; piìkalaci ne mbidimu binunu lukàmà, leelù ewu, Yesù neàpingane pa buloba mu mubidi ùdì ùmweneke, bwà Èkèleeyìyà kampànda, Mupikula awu—awu, Mukàjì-musela, neaMupatule pambelu apa. Nàンsha cinyi mwà kulwa, anyi kuya, myòdele, bamba ne “tungunuka,” ne bantu bàdi mwà kwendela mu ndondo wa mîdimà ya menemene eyi ne kwitabuuya cintu kanà cyônsò cidibo baswè kwitabuuya aci, kàdi bwà Yesù Kilistò neàpingane cyàkàbidi. Ndi ne dyeyemena kudi Yé bwà matükù àcilwalwà, dîbà adi. “Mukalenge Nzambì, ncyêna mumanye ne maalaba mmulame cinyi to, kàdi ndi mumanye ne Wéwè ngudi mulame maalaba.”

<sup>149</sup> Dîyì Dyèndè dìdi ànu mùdì dinwangana dinènè dyà mijiki. Mbanganyi bàà ku nwénù bákààdiku bumvwe dinwangana dyà mijiki? Èè, bantu bônsò bakaadi bumvwe. Mpindyewu vùlukààyi ne, dinwàngana dyà mijiki mpàdì müjiki munkaci mwà kwimbiibwa mu dinaya kampànda. Ngeela meeji ne ndi mucyámbe mu cyôci, dinwangana dyà mijiki. “Peetelo ne Mbwa wa diitu,” nudi bavùluke aci, bwalu bulonda bwà kale bùvvwàbo ne ciibidilu cyà... Nkaadiku muumvwe cyôci aci, mutùbo bangata ngoma ne bàdidisha tu—tunyuunyi tukesè twà mbonkòdi twà diitu atu, ne Peetelo upatuka, ne dikungula dyà mbwa wa diitu, ne didila dyà mpungi; dinwàngana dyà mijiki.

<sup>150</sup> Mpindyewu, wéwè kuyi umvwa dinwàngana dyà mìjiki, mmutooyi wàbûngì pàtupù bwebè wéwè, wéwè kuyi udyumvwa to. Bikèngela umvwe ne ncinyi. Ncyenza cyônsò kudi bimanyinu ne dinyungakana, kàdi dìdi dipatula dinaya kampànda mu dinwàngana dyà mijiki adi. Mpindyewu, tudi tumòna ne, muntu umwèpele udi umvwa dinwàngana dyà mijiki mmusàki wa

musambu ne aba bâdi ne dijinga dyà kudìmanya, mbamanye nshintulukilu yâdi, mbamanye cidi cyènzekà.

<sup>151</sup> Musàki wa musambu mmumanye dinyungakana dyônsò, kuumukila ànu ku ndekeelu too ne ku mbangilu, kuumukila ku mbangilu too ne ku ndekeelu. Nuvwaku bamanye aci anyi? Ewu wâkàufunda awu, ùdi ùsàka eci nùnku, yèyè mmumanye ndungilu yônsò. Piìkalayè mumanye ndungilu ne ndungilu yônsò, ki mùdi pèndè mulombodi ne cyà kwenza, bwa kuwùludika. Mpindyewu mmunyi muwàkonyangajila twitabààyi webè awu mu ciine aci? Dipangila dimwèpele dikesè dyà dikombo adi, cimanyinu aci, dipangila ànu dimwèpele dyà cimanyinu ku ndungilu awu, ndifwànyine kwenzeja musùmbà mujima wa bimbi cyà patupu, kunyangisha dinwàngana dijima dyà mùjiki. Mpindyewu s'nudi bamanye ne aci ncilelèlè. Bikèngela musàki wa musambu ne muludiki biikale mu nyumà umwe.

<sup>152</sup> Ki bwà cinyi mwambi ne Dîyì dyà Nzambì, Dinwàngana dinènè dyà mijiki dyà Nzambì didiYe munkaci mwà kwimba kacya ànu ku kabundubundu kàà bikondo; mwambi, ku Dîyì, kabyèna bikèngela àtangila apa àmba ne: "Ngeela meeji ne bivwa bikèngela eci cìikale; bivwa bikèngela nwénù ku Cyenza mùshindù kampànda ewu." Bikèngela alonde mùshindù ùdi kabèjì kàà Mùjiki kàmba bwà kucyàngata amu. Mùshindù awu ki ùdi ùkengela bwà Èvànjeelìyò kuyiishiibwayè, mùshindù ùdi Dîyì dyàmba bwà kuMwangata. Nudi bamanye's, wêwè mwà kwelaMu twitabààyi kampànda, apu's cintu cyônsò nkòòng ncinyanguke. Bidi bikèngela bwà kwenzaci dinaya adi ànu mu dyôdì menemene.

<sup>153</sup> Muludiki ùdi ne cyà kulonda mùdi musàki wa musambu mwambe, kutuuta mikùmu ànu menemene nànku, yà mùjiki awu. Mpindyewu tangilààyì, byônsò mbyenzà ku bimanyinu, ne bidi bikèngela ciikàle cimanyinu cyà mùshindù mujaalame, bwà kupatula mwadi wà mùshindù mujaalame.

<sup>154</sup> Pôlò wàkamba ne: "Piìkala mpungi upatula mwadi mulubidile, wadilongolola ku mvità nganyi?"

<sup>155</sup> Mpindyewu udi umòna Musàki wa musambu awu, Nzambì, Yéyè wàkafunda Bible awu, cidi ànu cyônsò dibuulula dyà Yesù Kilstò. Üvwa mumanye dishintuluka dyà cikondo. Nènku mutu awu, mu–muludiki udi ubaludika awu, cimanyinu cyà cikondo, bikèngela kuperanganaci ànu menemene ne bimanyinu byà Bible. Àlèluuyà! Ekèlekèle, ekèlekèle, ekèlekèle, ekèlekèle!

<sup>156</sup> Kaa, mwanèètù wa balùme, mwanèètù wa bakàjì, mbwalu kaayi ebu ne bàà pa buloba's? Ndi mupâle bwà cinyi? Kudi katanyi mwaba kampànda. Dinwàngana dyà mijiki kadyena mu dyumvwangana dyà menemene ne dibeji dyà Mùjiki to! Bâdi munkaci mwà kwenza twitabààyì yà èkèleziyà ne

bikwàbo byônsò, padibi ne Dîyì ndidì ne cyà kuyishiibwa, bwà kumweneshiibwadi. Cintu kampànda cyà cipampalamuke mu baludiki abu, dîbà adi cisùmbu cyônsò cyà bimbi bàà misambu aci cidi mu cibwejàkàjì, ne ki mbamanye cyà dyenza to. Bônsò bàdi ànu benza maalu a lukutukutu ne: “Cidi cyenzeke ncinyi? Eci ncifwanyine kwenza cinyi? Ncinyi, eci ncyenzeke bishi? Eci, aci ncyenzeke bishi?” Ki mbamanye cyà dyenza mpindyewu to. Cidimwanga, bwalu ki ncibwelaku mu dyumvwangana ne Dîyì adi to. Ki lutàtu lutudi naalu ndwôlò alu, ne citùdì tubiìkila ne, ditabuluja dyà ditùkù dyà ndekeelu. Ki lutàtu ludi naalu mukenji wètù wa beena Mpenta ndwôlò alu. Tudi batapuke mu cikèmu cyà Bible, kuya ne kadyenza bulongolodi ànu mwakenzabo kale wàwa. Yéyè kupambuka cikèmu aci.

<sup>157</sup> Nzambì, wâfwakù luse. Mvw'a kujingaku kwikala ne mêtì àdiku mwà kuCipwekesha mu ndondo, ànu bu ne, mvwaku mwa kukangula ne kuCipongololamu.

<sup>158</sup> Kwenaku mwà kumònà, wêwè mwanèètù wa balùme, mwanèètù wa bakàjì ne, bìkèngela ciikale mu dyumvwangana anyi? Muludiki ùdi ne cyà kuperangana ne Dîyì. PadiDi dyàmبا cintu kampànda, kwambi wêwè cintu cishìllàngànè to; nebìfile cimanyinu cyà mashimi, dîbà adi cintu cyônsò mu kaabujimà cidi cipatuka mu cyoona. Ncyà bushùwà. Dîyì dyà Nzambì ndyumvwilangana dyà luse dinènè, anyi, dinwàngana dyà mijiki's we. Mfwilaayiku luse. Udi ne cyà kubanga mwàkenza Ye amu, mu Müjiki. Udi ne cyà kubanga Nendè. Mònaayi, bwelaayi mu cyoona Acì.

<sup>159</sup> Wêwè udi wamba ne: “Èè, mêmè's nkaadi mukashààle wa mu èkèleeyiyà.” Aci kî ncyoona to. “Ndi mwenze cikampànda.” Aci kî ncyoona to. “Ndi mubànda ku cyoshelu ne mêmè—mêmè kwamba ne: ‘Ndi ngiitabuuja ne Yesù Kilistò m'Mwânà wa Nzambì.’” Sàtaanà's utu wenza cintu cìmwècìmwè aci. Aci kî ncyoona to. Nwamònù's, udi mupatuke mu dilondangana dyà cyoona. Cyàkenzeka ncinyi? Pàmwàpa muludiki kampànda mmukwambile ne: “Labùlàngana ku cyanza ufunde dînà dyèbè mu mukàndà; shààla wa mu kasùmbù kètù, mu bulongolodi bwètù.” Nudi bônsò pambelu pàà cyoona's!

<sup>160</sup> Dîbà adi pààbangà cintu cilelèlà kwenzeka kaaba aka munkaci mwà musùmbà mukesè, nenwâmbè ne: “Èè, kadi bishi bwa Cyàcyà, bàdi pambelu pàà dyumvwangana.” Alukilaayi ku Dîyì bwà numònè ne nganyi udi pambelu pàà dyumvwangana. Numònà cidi Nzambì mulaye. Numònà civwa Musàki wa musambu mwambe pa Bwalu abu.

<sup>161</sup> Nwamònù's, nudi ne bantu bônsò mu bateejeji bëènù. Ki bwà cinyi bàà pa buloba bàdi bakenzakana's. Pavwabi bìkèngela bwà kutangilabo èkèleeyiyà bu mùtootò wà ûbalakana, wà ûkenka, Bukénkè budi butèèkiibwe pa kakùna, bùdi muntu kàyi mwà kujimà, Bùdi muntu kàyi mwà kupiïsha to.

<sup>162</sup> Kadi, leelù ewu, ncintu cyà kusekabo kùdi bàà pa buloba, mbwalu baludiki mbacyumushe mu dyumvwangana ne Musàki wa musambu. Nudi bumvwwe cíndì muswe kwamba aci anyi? Bàdi batuuta bintu bìdì kabìyì Mu to. Bimbi bàà mùjiki bàdi ne lutàtu lwà kumanya cyà dyenza mpindyewu; èkèleeziyà, badi bônsò mu cibwejákàjì. Tudi bákula pa cintakanyi cyónsò aci, bidimu byónsò ebi, ne tucipiìsha, kadi mpindyewu munkaci mwà kudiswikamu. Kaa, kudi cintu cipampàlìmuke mwaba kampànda.

<sup>163</sup> Mònayai, nudi ne cyà kubanga mu Mùjiki mwàkenzaYe amu, kubwela mu cyoona Cyàwù, kubwela mu Dîyì dilaya. Kumona mwàkacyènzaYe ku cibangidilu, kumona mwàkacyènzaYe mu cikondo cyàpakaci, kumònà mùshindù udiYe ucýenzo mpindyewu, misangu yónsò anu mùshindù ùmwèùmwè awu.

<sup>164</sup> Tangilààyi muludiki awu, mùshindù udiye úcyènza. Yéyè kàiyi úcyènza to, yéyè ùnùfunkwina ku bulongolodi kampànda; kakutuku kwanji kwikala muludiki ukààdiku mwenze aci to. Muludiki uvwa misangu yónsò ànu ùkufunkwina ku Dîyì. Baprofeta bàà kale, bààkafunkuna ku Dîyì. Bàvwa Dîyì. Bàvwa ne nsòmbelu wa Dîyì. Nènku cyàkenzà cinyi? Cyàkamwènèsha Nzambì. Aci cyàkatwàla Dîyì difùndà bwà ditùkù adi ku mwoyi, bwalu Dyôdì dyàkalwa kùdibo. Dyàkabàbuludiibwa. Ke civwà lwàbo Lubwebwe. Àlèluuyàh!

<sup>165</sup> Yesù Kilistò, Dîyì dyà Nzambì, ki Lubwebwe lwètù. “Pa lubwebwe elu Nêngììbakilèpu Èkèleeziyà Wanyì,” Dîyì dibuulula dyà Nzambì. Shalom, kùdi mwena kwitabuuja mulelèlè. Ditalala’s wè! Tukaadi ku cikondo cyà nshiìkidilu. “Pa Lubwebwe elu Nêngììbakilèpu Èkèleeziyà Wanyì,” dibuulula dyà Dîyì.

<sup>166</sup> Ewu wamba ne: “Èè, Wêwè’s udi muntu munènè. Udi bu Môsà. Udi muntu munènè. Udi bu . . .” Ki ng’aci to.

Kadi dibuulula ndyambe ne: “Wêwè udi Mwânà wa Nzambì.”

<sup>167</sup> Yéyè ne: “Kî mmusunya ne mashi bìdì bikubuulwileCi to, kàdi nTaatù Wanyì udi mu Dyulu. Pa Bulelèlè bubuulula ebu, Nêngììbakilèpu Èkèleeziyà Wanyi.”

<sup>168</sup> Ncinyi ciine aci? Yéyè udi Dîyì. “Ku cibangidilu kwàkadi Dîyì, ne Dîyì dyàkadi ne Nzambì, ne Dîyì dyàkadi Nzambì,” ne Dîyì dicidi ànu Nzambì. Ànu Yéyè, umwèumwè awu leelù ewu, ùDimwènesha ànu muvwaYe amu; Môsà ne Eliyà, ànu nànkú, ne Yesù, ne Nzambì umwèumwè awu leelù, ciMuvwija “Yesù Kilistò umwèumwè awu makèèlèlè, leelù, too ne kashidi,” Ebelu 13:8. Nwamònú’s, kabàvwakù bakufunkwine ku kasùmbu kampànda to. Bàvwa bakufunkwine Muntu, bakufunkwine ku Dîyì, Nzambì.

“Ndi mbangila penyi, Mwanèètù Branham?”

<sup>169</sup> Ku Nkurusè, bangila Nendè ku Nkurusè. “Nyingala, itabùùja Dìyì,” ki cìdì Bible mwambe. Pashiishe londela mu cyoona cyà Dìyì dìdì dishaale adi.

Wêwè udi wamba ne: “Èè, nêngéñzè cinyi?”

<sup>170</sup> Tungunuka wêwè ànu ne kulonda cyoona cyà Dìyì adi. Piìkalabi ne “nyingalalaayi” ki cintu cyà kumpàla, mu kujingulula, enza cyôci aci, ki cidya cyebè cyà kumpàla ncyôci aci. Teeka cidya cyebè cìdì cilondà padi Dìyì dyàmba. Tungunuka, ànu nànkú, mutungunuke ne kwenda Nendè.

<sup>171</sup> Kunyangakajiku cyoona to wêwè mwikàle citùpà cyà Dinwàngana dyà mijiki cyà Nzambì. Kunyangakajiku cyoona cyà Dìyì to. Kukonkikù ne: “Èè, bwà cinyi? *Cikampànda* ncyenzèke bwà cinyi? Mvwa mucitéète, Mwanèètù Branham, kadi, pààkangiipatàbo apu, udi mumanye cíndì mwenze anyi? Mémè ntu mwambe ànu kufwà ne nzala.” Kwebeji ne mbwà cinyi to. Yéyè mmumanye cyoona, mùshindù ùdici ne cyà kushintuluka, ne ndungilu kaayi yìdici ne cyà kwenza, èyowà’s, mukalenge, bwalu Bâàkafunda. Yéyè mmumanye byônsò pa Cyôci aci. Yéyè mmumanye cyoona aci. Kwèbejikù ne mbwà cinyi to. Ù’Cítàbùùjè!

<sup>172</sup> Nzambì mmutùngùnùke mu cikondo cyà maalu-malonda, ne Dìyì Dyèndè dilaya, mu cikondo ne cikondo cyônsò, ne kacya katuku mwanji kupangila (bwà kunyangakaja) cyoona aci, ku Bukolè bwà Nzambì, pààkafikaBu kùdì cisàmbà cisungula ne cishindika to. Cyoona cyà Dìyì Dyèndè mu matùkù à Noa, cyoona cyà Dìyì Dyèndè mu matùkù à Noa, mu matùkù à Môsà, mu matùkù à Eliyà, mu matùkù à Yone, mu matùkù à Davìdì, mu matùkù à Yesù, ànu nànkú, Yéyè mmulame cyoona cyà Dìyì, wenda uya ànu nànkú, kacya katuku muCinyangakaje to. Yéyè wàkakatùngunuka ànu nànkú mu maalu-malonda. Ne Dimiinu disungula, dyàkaCìmòna ne kuCìitabuuja adi, kudibwinkadi buludi mu cyoona aci pàmwè naaDi.

<sup>173</sup> Bakwàbo bàdi bàmba ne: “Èè, kadi èkèleziyà ùdi wàmba...” Aci kacyèna ne cyà dyenza naaCi to. Kwêna muledìibwe bwà kwenza nànkú to.

<sup>174</sup> Udi muledìibwe mu Dìyì, bwalu udi muledìibwe mu Kilistò. Kilistò n’Dìyì, èyowà’s, mukalenge, cintu ne cintu mu cyàcì cikondo.

<sup>175</sup> Wêwè udi wamba ne: “Èè, s’nénkwambìlè, Mwanèètù Branham, mêmè ncyêna mwà kutangila kumpàla to.”

<sup>176</sup> Dìbà adi tàngila kuulu. Nzambì mmulaye, wêwè mwà kubànduluka, kuMumòna; shalom, ditalala, ditalala dyà Nzambì dìdì dìkwikishisha.

<sup>177</sup> Wêwè udi wamba ne: “Kadi mbwà cinyi bakwàbo bàdi bangelulwila, Mwanèètù Branham? Udi mumanye’s, bakwàbo batu bangelulwila, bàmba ne mêmè—mêmè ndi ne ‘nsuki mile,’

ndi ‘wa cyena kale,’” bwà bakàjì. Bwa muntu mulùme ne: “Bwalu mêmè ndi ngiitabuuja Bible ne: ‘Kwêna kàbìdì neetù mu bwobwùmwè to. Katwèna mwà kukwitaba to bwalu udi—udi wêwè witabuuja *bikampànda ne bikansanga.*’”<sup>178</sup>

<sup>178</sup> Kadi pèèbè mumanye ne bìdi menemene ànu mùdì Dîyì difundiìbwé amu. Nzambì mmwenzejjìbwé kûdì, bwà kutwà Cyôcì aci nyama ku mikòlò. Ncyà bushùwà ne m’Mwenzejjìbwé kûdì. Abi kabikutacishi to, ne mbwà cinyi bâdi beèlulwila. Nzambì ùdi Nzambì wa mukàwù. Vùlukààyì ne, kukenga bwà bwalu bwà Dîyì Dyèndè mbisaamà byà dikola byà ngâsà Wendè. Paùdi ukenga bwà bwalu bwà Dîyì Dyèndè, bìdi ànu mbisaamà byà dikola.

<sup>179</sup> Nudi bamanye mudi mwânà mutekète, wa bidimu dikumi, dikumi ne bìbìdì, upeta bisaamà. Ùdi ùbwela, wàmبا ne: “Maman, mabòko àànyì adi ansaama ne mikòlo yànyì yìdì yisaama,” ne bikwàbo. Bìdi ànu mbisaamà byà dikola’s. Bìdi bileeja ne ùdiku ne vitamines mîmpè. Ùdi munkaci mwà kukola.

<sup>180</sup> Nènku padi muntu ubanga kukwelulwila, wamba ne: “Mwânà wa bakàjì ewu’s ngwa cyena kale. Tangilaayi mulùme wawa, ùdi... Kaa, ndi nkwambila, s’ùvwa ne ciibidilu cyà kwikalà...” Èyo, wavùluka ànu ne, mbisaamà byà dikola. Aci ndikengeshiibwa dìdì dîmpè bwèbè wêwè. Mbisaamà byà dikola.

<sup>181</sup> Kaa, èyowà’s, Yéyè ùtu wànyishila nkùrusè ne masangu a njila ne ndungilu. Ùtu wenza aci ànu misangu yônsò, bwà kutupwangaja bwà mudimu Wendè. Yéyè ùtu wànyishila bintu abi bwà kwenzekabi. Kanwenaayiku mwà kuumvwa aci anyi? Yéyè udi wenza nànkú bwà Wàmòna mwà kukupwangaja bwà dibììkila didìYe mukubììkile. Ki bisaamà byèbè byà dikola mbyôbì abi. Yéyè wàkenzà Danyèlè mùshindù awu, nudi bamanye’s.

<sup>182</sup> Yéyè wakenza bânà bàà beena Ebèlu, mu cikùtù cyà kapyà. Cyàkenza cikùtù cyà kapyà ncinyi? Cikùtù cyà kapyà cyàkakosa ànu myonji yivwa mibàswike ayi. Ki cyônsò cyàkenza cikùtù aci, ànu kwôsha kusùìlula myonji.

<sup>183</sup> Misangu mikwàbo bitu bìkèngela mateeta bwà kukosa myonji ya maalu à pa buloba kutùdì, kukupatula mu maalu à pa buloba. Mbifwànyine kwikalà, bìkèngela bwà kukupatula mu twitabààyì webè, dyàmbedi. Mbyenze bu muntu munkaci mwà kunwa tubalu úfwa mu musulu amu, bìkèngela ùmupatulè mu musulu amu kumpàla kwà wêwè kupatula musulu munda mwà muntu awu. Bidi byàmba kuperangana ne mùshindù ùdi Nzambì ne cyà kwenza mîngà misangu. Banji bakwele pambelu, musangu kampànda, pashìishe bapatula maalu à buloba mu wêwè. Bìkèngela bwà—bwà kukupatula mu maalu à pa buloba, dyàmbedi. Misangu mikwàbo bisaamà byà dikola ebi mbitu byenza nànkú. Kaa, èyowà’s.

<sup>184</sup> Nzambì ùtu wimana pa Dîyì dilaya bwà cidimu cyônsò cipyacipyà. Yêyè ùdi wîmaPù, cidimu eci, bwà kuja cidiYe mulayè bwà cidimu eci. Nàンsha ciikàle cinyi, ndi muswè kwikala ànu munkacinkaci menemene mwà diswa Dyèndè mu matùkù àcilwalwà, mwàkenzàbo amu.

<sup>185</sup> Bu Abraham, pààkafikaye mu masangu èndè à njila awu, kavwa mumanye mwà kupita naabi to. Nzambì wàkamwambila ne: “Nénkupèèshè mwânà wa balùmè.” Bidimu makumi àbìdi ne bitaanu bulubulu uwva ànu yéyè mwindile ciine aci. Ndekeelu wa byônsò mwânà awu kulwaye, pashìshe Nzambì kwamba ne: “Mpindyewu, ku mwânà ewu, Nénkuvwijè taatù wa matunga àbúngi. Bânda nendè kuntu kwàka kadi umushipe. Bânda nendè kadi umushipe,” kushimbula cintu ciine civwayne mwindile bidimu makumi àbìdi ne bitaanu aci. “Bânda nendè umushebèyè.”

<sup>186</sup> Abraham kààkatàcishiibwaku to. Kacyàkamutàcishaku to. Kwambulaye nkunyi ne kuyambikaye pa kampundu kakesè, ne kwangataye mwanèndè wa balùme awu. Kubàndayè nendè too ne ku lusongo lwà kakùna aku, bwà kumulambulayeku, bwalu Abraham ûvwa mumanye ne yéyè ûvwa mumupete bu mubiike ku bafwè; Matrice à Sarah ôwò akaavwa mamane kufwà, yéyè ûvwa nkumba, pa nàñku kakùvvwakù mùshindù to. Nènku mwânà wa balùme awu... Ùkaavwa ne bidimu lukama, ne mukàjì ùkaavwa ne bidimu makumi citeema, pa nàñku wàkalwa ku Dîyì dilaya. Nzambì umwèumwè wâkenza mulayi awu, wàkamba ne: “Nénkuvwijè taatù wa bukwamatunga,” paanyimà pàà bidimu makumi àbìdi ne bitaanu, ne mwikalà ne bidimu lukama, yéyè ne mukàjèndè kuptabò mwânà awu. Piìkalabi ne Nzambì wàkamwambila bwà kumulàmbulaye, Nzambì ûvwa ne bukolè bwà kumujuula. Amen.

<sup>187</sup> Nzambì atumbe's wè, bâna bëètù. Ndi ndyumvwa bîmpè. Ngümvù butendeleedi bwàmbwedì's wè. Pa nàñku mùshindù mwine ûndi ndyumvwa bîmpè's we! Ndi mumanye cintu cimwèpele eci ne, Yéyè udi ne bukolè bwà kumujuula cyàkàbìdi. Netwîmanyinè pa Dîyì dyà Bukènkè dìdì kadiyi disambakaja dyà dîbà edi! Nzambì neâtùbiishè pàdì lukòngò elu lùlwa, bu Makénkè akenka bwà kulwisha lukòngò elu. Amen.

<sup>188</sup> Kabyèna bikemesha to pààkambaYe ne: “Mukalenge-mukàjì wa ku Sud neàjuuke mu Cilumbulwidi, ne lukongo lwèndè, ne neàlupiìshè; bwalu wàkalwa ufumina ku bitùpà byà kulekùlè byà buloba, bwà kuumvwa lungenyi lwà Solomo, ne, mònayi, munène mutàmbe Solomo ùdi mwab'ewu.” Mùshindù mwine ûvvà mukalenge-mukàjì mukese awu, mupweke too ne kwinshi aku, mumpàngaanu, mumòne Bukènkè abu, ne mulwe wenda mu ntanta wa kilòmèètà yàbúngì mu cipeela amu, ngondo yìsàtù pa kaameelu, bwà kuumvwa lungenyi lwà Solomo, ne bôbò bavwa biimane mwaba awu mene, ne Solomo bu cifwànyikijilu, cimfwànyi Cyèndè.

<sup>189</sup> Ne pashiishe kulwa ne kumona Wesley, Luther, bakwàbo bônsò abu, màngumba paanyimà pààpa, biikale cimfwanyi ne cifwanyikijilu cyà cìdì munkaci mwà kwenzeka mpindyewu eci, kàdi biikale bendelaMu buludi. Kaa! Eyo.

<sup>190</sup> Bwalu, nènku cidimu cipyacipyà ncipàngadika kudi Nzambì, pàngadika wêwè ànu bwà kushàala mu Dîyì Dyèndè. Endela mwaba ùdi Dîyì dyàamba bwà kwendela, patükààdi tuseemena mpindyewu pabwîpì ne dyoya apa, mwâkenza bakwàbo abo, Dimiinu disungula mu ditükù dyàbo pààkamonabo Dîyì. Bâàkenza cinyi? BâàkendelaMu, piìkalabi ne bavwa Dimiinu disungula mu bikondo bikwàbo, bwalu Yéyè udi Dîyì dìdì kadìyi dipangila adi. Mbanganyi bàdi biitabuuja ne Yesù Kilistò udi Dîyì? Kaa, ekèlekèle!

<sup>191</sup> Mvwa muumvwe ndongamu kampànda ditükù adi, wa dingumba kampànda dyà bantu, Mukalenge H. M. S. Richards kwambaye ne yéyè nguwa "mufunde mukàndà wà cidimu awu." Ncyêna muswe kwikala mpangakanangana ne muntu wa mùshindù awu to. Nànscha mudìbi ne, ng'Adventiste du Septième jour, ncyêna mpetangana ne dilongesha dyà ba-Adventistes du Septième to, kàdi ncyà bushuwà ne mêmè ntu munange muntu awu. Kàdi ncyàkupetangana nendè ku mèyì to. Aci cìdì mwà kwikala mukàndà wà H. M. S. Richards bwà cidimu cipyacipyà.

<sup>192</sup> Kàdi wànyì Mukàndà ne wèbè Mukàndà, bwà cidimu cipyacipyà, m'Mukàndà wà cidimu cyà kale, Bible, Dîyì dyà Nzambì. Enza wêwè ànu ne Wikale ne mwoyi ku cìdìWu mulaye bwà kwikadila ne mwoyi aci. Éyowà's, mukalenge. Ne cidimu cyônsò cicìlwalwa cìdì cilwa eci, ne cidimu cyônsò cikààtùku eci, Yéyè ùdi Nzambì wa Cyendèlèèlè mwikàle ne mwoyi ku Dîyì dyà Cyendèlèèlè dyàkambàYe adi, pàdi Bulelèlè bwônsò bwà mu Bible ne mulayi ônsò wà munda mwàWù mushindìkùlbwe, ànu muvwawu munda mwà bikondo byônsò.

<sup>193</sup> Mùshindù mwine wàkalaya Nzambì ne neÀbutule bàà pa buloba ku mâyì, ne Wàkacishindikila kùdì Môsà...anyi kùdì Noa.

<sup>194</sup> Wàkalaya ne Ùvwa mwà kutuma musungidi, ne kupatula Izàlèèlè mu Èjiipitu; bavwa bashààlemu munda mwà bidimu nkama yinaayi. Wakenza ànu aci menemene.

<sup>195</sup> Ne Wàkadicipa ne Ùvwa mwà kujuula Davìdì, ne mùvvà Davìdì mwà kwikala mwâ—mwânà wa balùme; anyi Kilistò ùvwa mwà kwikala mwanèndè, ku Davìdì kuvwa mwà kulwila Kilistò. Mùshindù wàkadicipàYe ne Neénzè cyôcì aci; Ki cyàkenzaYe.

<sup>196</sup> Wàkalaya ne Ùvwa mwà kutuma Yone Mubàtiji, kumpàla kwà dilwa dyà Yesà Kilistò. Ki cyàkenzaYe.

Yéyè wàkalaya ne Ùvwa mwà kutùma Maasiyà. Ki cyàkenzaYe.

<sup>197</sup> Wàkalaya ne buloba buvwa mwà kubwela mu musùmbà munènè wà malongolodi ne kwenza ndongolwelu kampànda, bukolè, bumanya bu nyama wa lwonji, ne ùvwa mwà kwikala kuntwaku musòmbe pa tukùna mwandamutekète. Byàkenzeka ànu nànku menemene.

<sup>198</sup> Mùshindù mwine uvwa èkèleeziyà mwà kubàkèngesha's, too ne ku lufù! Bààkenza ànu nànku menemene.

<sup>199</sup> Muwwabo mwà kupatuka mu dilongolola! Bààkenza ànu nànku menemene. Mùshindù wàkalayaYe mu cikondo ne cikondo cyônsò ne necyenzeke!

<sup>200</sup> Ne Wàkalaya bwà cikondo eci. Nènku's ki Yéyè ewu, leelù ewu, wenza ne Dìyì adi dìkale ne mwoyi, ànu mwàkenzaYe ku cibangidilu menemene amu. Cyà bushùwà's.

<sup>201</sup> Nènku pàdi mulayi ônsò uujiibwa: "lufù luminyìbwe mu bucimunyi," Yesù neàlwé; ne wa ndekeelu mushindikìbwe, díbà adi nekùlwé ditalala dyà Cyendèlèlè pa buloba, ne shalom wa Cyendèlèlè. Shalom wa Cyendèlèlè, ditalala, nebìshaalè pa buloba.

<sup>202</sup> Pààkalwa Yesù, Mfùmù wa Ditalala, bwà cinyi kakùvwà ditalala? Bwalu Dìyì dyônsò kadyàkuula mu ditùkù Dyèndè adi to. Ùdi munkaci mwà kuDyûja leelù ewu. Kàdi piikala Dìyì Dyèndè dilaya dyônsò, divwa meeji à Nzambì adi . . .

<sup>203</sup> Dìyì ditu "meeji mapatwila patòòke." Nzambì, mu meeji Èndè, muDyelela meeji, ne kuDìleejila patòòke ku baprofeta Bèndè, ne mpindyewu bìkèngela Dyùlè. Nènku, padibi ne, Yéyè ukaavwa mudyanjile kutwambila maalu aa bwa katùlù kwenza cilema ne kutukina mu mìdimà to díbà adi, patùdì tucimònà munkaci mwà kuula.

<sup>204</sup> Mpindyewu, Yéyè wàkalaya bwà kutuma Kilistò musangu mwibidì. Ne díbà kanà dyônsò didìYe ùmutùmà adi, pààlwà Kilistò musangu mwibidì, nekwikalè shalom wa Cyendèlèlè.

<sup>205</sup> Tèèlejààyì, balunda bàànyì, patùdì tujikija apa. Vùlukààyì ne, Bible ke mpokolo wa lungenyi lwônsò. Kalwena lùfùmine kudi Mulongeshi, Ph.D., LL.D to. Lùdi lùfùmine ku Dìyì dyà Nzambì.

<sup>206</sup> Kuvwa ba-Docteurs mu Bunzambì basòmbe mwaba awu, nkama ne nkama, ne Mwânà mukesè wa balùme wa bidimu dikumi ne bìbìdì kubatwishaye pânschi, bwalu Yéyè ùvwa Dìyì. Mwânà mukesè wa balùme awu kavwa ne kàalaasà kalonga nànsha kakesè to, kàdi Yéyè uvwa Dìyì. Bwalu Yéyè nguvwa Bukénké bwakula bwà ditùkù adi, Yéyè uvwa munkaci mwà kumwenesha Dìyì adi. Dìyì divwa munda Mwèndè. Bivwa ne cyà kwikala nànku. Kabyèna bikemesha to pàvvà civvvàYe cyènzeke, bwalu Yéyè ùvwa Dìyì. Nudi bûmvwe anyi? Bônsò bàdi bûmvwe, bambe ne: "Amen." [Disangisha dìdi dyàamba ne: "Amen."—Muf.] Yéyè uvwa Dìyì.

<sup>207</sup> Vùlukààyì Bible, kí mmukàndà kampànda wà cidimu ùdi mufunda kùdì muntu to. “Dîyì dyà muntu yônsò dììkale mashimi, kàdi Dyànyì Bulelèlè.”

<sup>208</sup> Ne tusumbu twa ntèndeleeelu ne ntèndeleeelu, ne—ne bikwàbo, byônsò bìdi ànu bicyompakajangana panùdì nubwejaMu musùmbà wa bantu. Kacya Nzambì kàtukù mwanji kukwata mudimu mu musùmbà bu nànku to. Bu Yesù mwa kulwa leelù ewu, Yéyè mmufwànyine kutwà ku cyà ba-Méthodistes, cyà ba-Baptistes, cyà ba-Adventistes, Bantemu bàà Yéhowàh, beena Science Chrétienne, beena Mpenta, anyi ba-Presbytériens? To, mukalenge. Ncyà bushùwà ne kààkwenza nànku to.

<sup>209</sup> Bwalu mbwà muntu nkààya, wêwè ne Nzambì. Kakwenaku bantu bàbìdì bàmona mùshindù ùmwepèle menemene, bônsò bàbìdì byà mwômûmwè to; kakwenaku byâlà bìbìdì bifwànàngane to. Nzambì ùtu ùkwàta mudimu ne muntu nkààyà. Kàdi mmunyi mûdì umanya ne mmubinge anyi kí mmubinge? Nànku ela dísù paanyimà umònè ní ùdi ne Dîyì. Yéyè mwikàle ne Dîyì, dîbà adi Nzambì ùdi ùkwàta nendè mudimu; byôbì kàbìyi nànku to, cintu kampànda cikwàbo ncìdì cìkwàta nendè mudimu. Nwamònu anyi? Ncyà bushùwà.

<sup>210</sup> Vùlukààyì ne, Bible ke mpokolo wa lungenyi lwônsò, ne mmulamè ditekemena dyônsò dyà matùkù ácilwalwà munda Mwèndè amu. Shalom, ditalala dyà Nzambì!

<sup>211</sup> Bu bwalu bwàkalondabu musangu kampànda, bwà mwânà mukesè wa balùmè wàkafwisha tatwèndè kàyi mwanji kufika bukolè bukumbane bwà kumònaye tatwèndè; ànu mwânà mukesè wa mu dibòko pààkafwa tatwèndè apu. Dîngà ditùkù pàkaavvwaye ne bidimu bitwe ku dikumi, anyi dikumi ne bìbìdì. Ùvwa ne mwanààbò mukwàbò wa balùme, dyèndè John. Kuyaye kùdi mwanààbò wa balùme, kwambaye ne “Uh, John,” uvwa yéyè mukulwende ku bidimu byàbûngì, yéyè ne, “udi, udi mùvuluke papa anyi?”

Awu ne: “Èyowà’s.”

Yéyè ne: “Ùvwa bishi’s?”

<sup>212</sup> Awu ne: “Èè, yéyè’s uvwa muntu mule, ne ùvwa muntu mwîmpè wa dikema. Ùvwa misangu yônsò ne musàangeelu kùdì maamù, ne ùvwà ne maalu mîmpè kû—kûndì, ne ùvwa ne maalu mîmpè kùdì bantu bônsò.”

Yéyè ne: “Èè, ki cyônsò cyûdì mumanye pa bìdì bimutangila anyi, John?”

<sup>213</sup> Awu ne: “Èè, lekà nkwmabìlè’s.” Kwambayè ne: “Henry,” yéyè ne, “bantu bônsò bâdi bàmba ne mêmè—mêmè ntù mumufwàne” Kwambayè kabìdì ne: “Bantu bônsò bâdi bàmba ne ndi ne ngiikàdilù bu yéyè.”

<sup>214</sup> Yéyè ne: “Kaa, abi’s mbîmpè! Ki cîndì muswe kumanya ncyôci aci.” Yéyè ne: “Pândì nkumona, ndi mmòna papa wanyi.”

<sup>215</sup> S’ki cyôci aci. Pàmònà bàà–bàà pa buloba Yesù Kilistò, neciikale mu wêwè, pàdì Dîyì dìdì difundìlbwe bwa leelù ewu.

<sup>216</sup> Mmwaba kaayi unùdì numònà Yesù mu Davìdì? Mpààkamwèneshiibwà Dîyì munda mwèndè.

<sup>217</sup> Mmunyi munùdì numònà Kilistò, Nzambi mu Eliyà, mu dikalu dyà mvità dìdì dibwela mu Dyulu adi, numònà Yesù mu Eliyà? Bwalu, Dîyì dyàkashindikiibwa.

<sup>218</sup> Mmunyi munùdì nuCimònà mu Môsà? Yesù uvwa mu Môsà. Bible ngudi mwambe nànkú. Nwamònú’s, ncyà bushùwà, Yéyè uvwa cipuka cìvwà cilakuka kapyà civwà ne Môsà mu cipèèla aci.

<sup>219</sup> Bantu nebàmanye Yesù Kilistò bishi? Padibo, yéyè, ùMumònà munda mwèbè, pàdibo bamònà Yesù munda mwèbè amu. Bwalu, Yéyè wàkamba ne: “Byenzedi bîndì Mêmè ngenza nenùbyéñzè pèènù. Nenwéñzè binène bipite ebi, bwalu Nyaaya kudi Taatù Wanyi.” Ncyà bushùwà anyi? Ki mùdibo, bàà pa buloba bamanya.

<sup>220</sup> Kabiyi ne mbwalu mwena Mpenta Unitaire mmunènè kutamba mwena Mpenta Binitaire to, anyi Binitaire mmunènè mutambe Trinitaire to, anyi cyônsò cyûdì naaci aci; kabiyi ne mbwalu Méthodiste mmunènè kutàmba ba-Baptiste to; anyi ba-Baptistes bà ku Sud mbàdì bangata dikopo cidimu edi bwà èkèleeziyà yônsò–yônsò yà ba-Baptistes, bwà beena Mishòonyì bônsò. Bâdì ne bidimba bipite bûngì eci cidimu kutàmba ne nganyi yônsò wa ku bâdì bashàale abu, mûndì nguumvwa, ku milubù. Aci kacyèna cibashintululaku nànsha kakesè to. Nzambi kêna ùnumanyina ku bûngì to. Bampangaanu batu banùpîte ku bûngì, dîbà kanà dyônsò edi. Beena Kâtòlikè bakaadi banùpîte nwénù bônsò. Ba-Mùzùlùmanyì’s mbabapite bônsò. Nwamònú anyi?

<sup>221</sup> Wêwè udi mumanyike mpàdì Yesù Kilistò ne mwoyi munda mwèbè, ku Mwoyi Wèndè, ne Dîyì dilaya dyà ditùkù edi diikale diDileeja. Nwamònú anyi?

<sup>222</sup> Mpindyewu Dîyì dimwèdìmwè divwa dileeja mu Môsà adi kadivwa mwà kwikala dileejìlbwe mu Eliyà to, bwalu adi divwa nditùkù dikwàbo. Civwa cileejìlbwe mu Noa kacivwa mwa kwikala mu Môsà to, bwalu, nwamònú’s, Noa wàkiibaka bwâtù, Môsà wàkalombola cisàmbà, ànu mwàkalayiibwaci menemene. Bukènkè bùmwèbùmwè bùvvwà bulleejìlbwe mu umwe, kabùvvwa mu mukwàbo to, kâdi umwe wàkaakula bwà mukwàbo.

<sup>223</sup> Dipungila Dipyadípyà dyônsò dìdi dyàkula bwà dîbà edi. Yesù Kilistò ùdi wàkula bwà dîbà edi. Nganyi awu, dîbà adi, muntu kampànda anyi? N’Yesù Kilistò, Mwânà wa Nzambi,

umwenesha, uleeja Bukénkè pa Dîyì dyàkalayaYe bwà ditùkù edi adi.

<sup>224</sup> Pàdì muntu ukumònà ne mwoyi bu Yéyè, pàdìye umònà ngiikadilu webè ne ngenzelu webè wa maalu bipetangane ne Dîyì menemene ànu muvwaYe amu, Dîyì dimweneshiibwe, dìbà adi bantu nebàmònè Yesù Kilistò. Kabyàkukèngela bwà kukenzakanabo myaba mikwàbo yónsò, bàmba ne: “Twitabààyì ewu udi ulongesha cinyi, cidi twitabààyì wáwa ulongesha ncinyi?” Bôbò nebàmanyè cidi Nzambì pàdibo bakumònà wêwè.

<sup>225</sup> Shalom, ditalala dyà Nzambì diikale Bukénkè pambidi péèbè! Nènku pàdì Dîyì dyà Nzambì dishindikiibwe mu cikondo eci, mu kaabujimà, ne nuDìmònà ne nuDìtabuuja, shalom kûdì!

<sup>226</sup> Kungamanganà ne cidimu cipyacipyà ne cyôcì eci, Mutèèka mwákambà Davìdì ne: “NêmMutèèkè misangu yónsò kumpàlà kwànyì. Bwalu Yéyè udi ku dyabalùme dyànyi, ncyàkunyungishiwbaku nànsha.” Wêwè mukatwilangane ne lufù eci cidimu, bìdì bishiintulula cinyi? Nzambì mmulaye ne Yéyè neàkujuule. Njiwu yôyì mikushipe, bidi bishiintulula cinyi? Udi ne Mwoyi wà Cyendèleélè: “Nêmmujuulè ku matùkù a ndekeelu.” Amen. Ambaaku tûng nî ncinyi nî ncinyi cyenzeke? Nànsha ciikàle cinyi, cintu nànsha cimwè kacyèna mwà kutùtapulaku ne dinanga dyà Nzambì, dìdì mu Kilistò to. “Nzala, njiwu, musùnsù, nànsha ciikàle cinyi, kakwèna cintu cidi mwà kutùtapulaku ne dinanga dyà Nzambì, dìdì mu Kilistò nànsha.” Ne Yéyè udi Dîyì. Shalom!

<sup>227</sup> Twinyikààyì mitù yètù. Mpindyewu bantu bônsò lamààyì mitù yènù miinyika bwà katancì kakesè. Ditalala dyà Nzambì!

<sup>228</sup> “Yà mupimbu...” [Katùpà kàà mukàbà wà mèyì munda mutupù—Muf.] “Ànu mwákadibi mu matùkù à Noa, mùvwàbò bâdyà, bânwa, bàselangana, bàsèlesha,” Reno kampànda, Nevada, ne buloba bujima bwà mudilu mukunze abu, “ki mwikalabi kàbìdì ku dilwa dyà Mwânà wa muntu.”

<sup>229</sup> “Ànu mwákadibi ku Sodoma,” kwàkamweneshiibwa Nzambì mu Muntu wâkabììkilàbo kûdì Abraham ne Elohim awu, Udi udikùmbanyina mu byônsò awu; mwimane mwaba awu, ùdyà munyìinyì, ùnwa mabèèlè, ne dyâmpà; ne mwikalé mwà kwamba ciwa Sarah wela meeji paanyimà pèndè, paanyimà Pèndè apu, mu ntenta awu. Wâkamba ne: “Aci necyàlukile cyàkàbìdì ku dilwa dyà Mwânà wa muntu.” “Katancì kakesè aka, bâà pa buloba kabààkuMmònà kàbìdì to; kàdi nwénù nenùMmònè, bwalu Nêngìikalè neenù, munda mwènù mene, too ne ku nshiikidilu kwà buloba.”

<sup>230</sup> Beena Yuda munkaci mwà kwalukila ku buloba bwàbò. Bintu bìdì munkaci mwà kwenzeka, bìdì mu ditùkù edi ebi, mbifwànyine kumpangisha bwà kwalukilaku ndambu ku mbangilu bwà kunwambila bìdì munkaci mwà kwenzeka, kàdi’s tudi babìmònè’s. Ncinyi ciine aci? Dîyì dimwènèshìibwe.

<sup>231</sup> Nudi nwela meeji ne cyàkenzà beena Ebèlu ncinyi pààkamònabo Dìyì dimwènèshìibwe, ne mulayi? Bààkadilongolola bwà kuumuka mu buloba abu.

<sup>232</sup> Pawikala kuyi mudilongolole leelù ewu to, mulunda wanyi, bangà cidimu cipyacipyà eci mùshindù mujaalame, ucìtwadije ne cyanza cyèbè mu cyanza cyà Nzambì, Dìyì dyà Nzambì mu mwoyi wèbè, wamba ne: “Mukalenge Yesù, ncyèna mumanye ne ncitùpà kaayi cyà Dinwàngana dyà mùjiki edi cyÙdì muswe bwà mêmè kwimba to, kàdi pàfikila ndungilu awu bwà mêmè kukengeshiibwa, kusekiibwa, kwelulwidiibwa, ncidì ànu mushàale mwimane mu mùshindù wà ne Dinwàngana dyà mùjiki Dyèbè kadyàkùnyanguka bwànyì mêmè nànsha. Nénshaalè ànu ne Dìyì Dyèbè, nànsha Dyôdì diikale cinyi. Nénshaalè ànu mwaba awu. Nènku pàkokola lufù ku ciibi cyànyì, ki citùpà cyà Dinwàngana dyà mijiki ncyôcì aci. Ndi mumanye dìbà adi, ne, ànu bushùwà pàdì lufù lukokola ku ciibi cyànyì apu, dibiika dyà ku lufù nedikokola pambelu apu dimwè dyà ku matùkù aa, kàbìdì, ne Wêwè neùnjuule cyàkàbìdì. Ncitùpà cyà Dinwàngana Dyèbè dyà mijiki. Mukalenge, enzaku bwà ngìikale citùpà cyàdì leelù ewu, Udkù mwa kuswa nànkú anyi?”

<sup>233</sup> Mbanganyi bàdi baswè kwenza mucipu awu, ne kwamba ne: “Kubangila ku cidimu cipyacipyà eci, Mwanèètù Branham, kubangila ku disangisha edi, mpindyewu mene, ndi mpindyewu ndaya Nzambì, bwà kwangata kaaba kàànyì, bwà ncìpangiku bwà kushaala ne Dìyì Dyèndè dilaya to, ne kwikala ne mwoyi menemene ànu mùshindù ùwwaYe mucilaye, mu kalolo ne didipwekesha; bwà Nzambì angate nsòmbelu wanyi ne amutèèke mu Dinwàngana Dyèndè dinène dyà mijiki adi, bwalu cisùmbù cìmwècímwè aci ncyàjuulaYe ku matùkù à ndekeelu. Ndi ngeela cyanza cyànyì muulu, Mwanèètù Branham, kî nkûdì wêwè to, kàdi nkûdì Nzambì. Wamvùlukakù mu disambila”? Nzambì ànùbènèshè, myaba yônsò. Mukalenge ànùbènèshè. Byanza byànyì mbyébì pààbì, byeela muulu.

<sup>234</sup> Mukalenge, ngangàtèku. Mukalenge Nzambì, kundekediku ntèèka meeji àànyì, bu Yudààsa, pa ndola mukwàbo, pa mùshindù kampànda wa pa buloba, anyi muntu kampànda bwà kukutuuta cyanza paanyimà to, wamba ne: “Kaa, Mwanèètù Branham, eci cidi . . .” To, to. Nzambì, aci kacingenzekediku to. Nêndondè ànu njila pàmwè ne banyààbanyà badyombola bàà Mukalenge. Nêngìkalè mwanààbù ne muntu, kwenza cyônsò cíndì pàànyì mwà kwenza aci, Mukalenge, nnangà bantu ne mwoyi wanyi wônsò. Kadi, Mukalenge, kundekediku nguumuka ku Dìyì edi to. Ndi muswe kujuuka ku ditùkù dyà ndekeelu. Nènku ànu aba bàdi mu Dinwàngana dinène dyà mijiki edi, Mukalenge, bu mûngàtee ci bwà kucyummwija mu mapingaja emu, bôbò abu ke bààlwà kundekeelu kwà—kwà dibeji dyà musambu, piìkala dibìika dinènè dyà ku lufù, ne Banjèlo bônsò

batuuta bikashi ne bansantu benda babwela. Mbôbò abu bàdì benze citùpà cyà dinaya adi mu dinaya dinène ditùdì twenza edi, ndi nsambila, Mukalenge.

<sup>235</sup> Tudi bamanye ne mu dinaya kampànda bàtu bàshintululu bibwikilu, bàdi buumuka ku cintu kampànda bàya ku cikwàbo, nènku ki ciWàkenza aci. Udi mufumine ku Nyumà, Nzambì, Yéhowàh Munènè, kàdi kuvwala cibwikilu cyà kwísù kwà muntu, kushintulula Webè—Webè—Webè ngiikadilu; Wêwè kushintulula. Wêwè kutentemuna Webè ntentà. Wêwè wâkapweka kuumuka ku Nzambì, ne kulwa muntu, bwà Wâmôna mwà kufwà bwà kupikula muntu. Wâkashintulula cibwikilu Cyèbè cyà kwísù.

<sup>236</sup> Pashiishe kàbìdì Udi mucìshintulule, ne Udi muDìbwikile mu bantu bàdì baswè kwitabuuja ne kwenza maalu bilondeshile Dîyì dyûdì Wêwè mufunde kaaba aka. Mêsù àdì àDimònà mmabènèshìibwe, myoyi yìdì yìDyàkidila mmibènèshìibwe, macì àdì àDitèèleja mmabènèshìibwe, bwalu nekwenzeke dibìika dyà ku lufù piìkalà Dinwàngana dyà mijiki dijikè. Nzambì, enzaku bwà twétù bônsò twikalemu, Ùdikù mwa kuswa nànkú anyi? Bèneshaku kasùmbù kakesè aka.

<sup>237</sup> Mu dyakula mùshindù ewu, Taatù, tudi bamanye ne mukàbà wà mèyi ewu tuyaaya pa buloba bujima. Kàdi ki kasùmbù kakesè kalenga aka, kasòmbe mwab'ewu leelù ewu, batèèleji bàdi bamweka ne mêsù apa mu Phoenix emu aba. Éyì Nzambì wa yààyà, bidimu dikumi ne bitaanu byà diyisha dyà dishile ne dyà ditandishangana, kàdi, Nzambì, Wêwè ngudi mumanye kabingila, dinanga! Dinanga ditu—ditu dinyooka. Dinanga ditu—ditu ditandisha. Dinanga ditu dikazamuna.

<sup>238</sup> Èyì Nzambì wa yààyà, swaku bwà ndisangeku pàmwè ne cisàmbà eci lumingu elu, ne swaku Utukazamuneku, Mukalenge, ne Diyi Dyèbè. Swaku bwà twamònaku bukolè Bwèbè bujuulà babèèdì ne beena ntàtu, mêsù à bampofo akangudiibwa, Nyumà Mwímpè munène awu ulwa mumweneshìibwe mu cibambalu emu. Swaku bwà mwambi yônsò ne èkèleeziyà yônsò alakuke kapyà. Swaku bwà mpungilu wa beena kantu-ku-byanza ulwàlwa awu, Mukalenge, atekèku mwoyi wa mwena kantu-ku-byanza yônsò, mu cimenga eci, mu kapyà bwà Nzambì. Enzaku nànkú, Mukalenge. Katwèna bamanye cyà dyenza pa bwalu abu to, cìdì citambe ànu kulomba ne kwitabuuja ne necyenzekè. Tudi tudilambula twétù biine Kûdì, mu Yesù Kilistò, Mukalenge wetù.

Nènku mpindyewu tujuukilààyì kuulu.

<sup>239</sup> Ndi mupèlé mu dyakula, ncyena nshindumuna myàku yànyì bímpe nànscha, kadi ndi muswe kwamba eci bwalu ndi mudyumvwe mucincimkìibwe bwà kucyènza. Mbanganyi mwab'ewu bàdì mwà kwela cyanza muulu, bwà ne nudi buumvwe cîndì njinga kwamba pa “Dinwàngana dyà mijiki dyà

Nzambì”? Ela cyanza cyèbè muulu. Twasàkidila. Mbîmpè. Udi ucìtabuuja anyi?

<sup>240</sup> Dîbà adi, n’Dinwàngana dyà mijiki, nwamònù’s. Neùsangànè ne Dìdi dilwa pa ndungilu, muntu yônsò ùdi ùdyèla nkonko. Mémè ndi ncibìikila ne ndungilu. Ncyêna mumanye mijiki to; mwimbi wa mijiki muneemu emu, mònà’s, yéyè’s mmufwànyine—yéyè mmufwànyine kumfwila luse bwà mùshindù wànyì wa mukàyàbale ewu. Kàdi, cìdi, bâdi batuuta, bìkèngela biikale ne cyà dyenza. Bìdi mwa kupweka menemene, byenda ànu bipweka, nwènù kudikonka ne ncinyi Eci; kàdi, nwamònù’s, nwènù babwele mu cyoona cyàCì, nudi nuCyùmvwa. Ki mùshindù wùmwépelè wuwikalàku mwà kuumvwa Nzambì, ngwà kubwela mu cyoona cyà Cyòcì aci.

<sup>241</sup> “Ncinyi ciine Aci? Mmunyi mûngààcyenzà? Mwanèètù Branham, mêmè ndi ànu Méthodiste wa cyà bushùwà ewu, Baptiste, anyi mwena Mpenta.” Aci kî ncyoona aci to.

<sup>242</sup> Cyoona n’Nzambì. Nzambì ùdi Dîyì. Dîyì didi Nzambì. Cyoona cyà Nzambì, cidi ne, kutùmikila Dîyì Dyèndè. Dîbà adi paùdi utùmikila Dîyì, Yéyè ùdi ùtuuta cyoona ùnu bwèbè wêwè, pashìsche udi wangata kaaba kèèbè. Dîbà dyônsò didiDi dìpweka, dìpweka, dìpweka, dìbanda, cyônsò cìdìDi aci, udi mumanye ndungilu ayi.

Misangu mikwabo udi wamba ne: “Kaa, màsaamà à myoyi ne mateeta!”

<sup>243</sup> Nzambì kààkambaku ne: “Maalu ônsò adi akwata mudimu pàmwè bwà dyàkalenga dyà bâdi baMunange, pândì Mêmè ntuuta Dinwàngana Dyànyì dyà mijiki apa anyi”? Nènku udi usangana dîbà adi ne udi mutàcishìibwe ne mwela pânshì, ne mukengeshiìbwe, bakwelulwila. Vùlukààyì ne, ki citùpà cìdi ciyà mu nànkú aci. Byôbì kabiyì nànkú awu to, dîbà adi Dinwàngana dyà mijiki adi dìdi pambelu pàà bulondyanganyi bwà cyona.

<sup>244</sup> Musàki munènè wa musambu mmumanye menemene ànu cìdi mu cyôcì aci. Yéyè mmumanye. Yéyè ùvwa mukumanye, kacya ku cibangidilu. Wàkafunda dînà dyèbè mu Mukàndà wà Mwoyi wà Mwânanà wa mùkòòkò, kumpàla kwà difuka dyà dyulu ne buloba. Udi witabuuja aci anyi? Yéyè mmumanye cyûdì ne cyà kwenza. Nànsha cyôcì cipwekà bishi, ne nànsha ciikàle cimweka cifiìke bishi, cidi ne cyà kwikala mùshindù awu.

<sup>245</sup> Kàdi, vùlukààyì ne, cyôcì cibwela buludi mu mindidimbì ya lufù: “Mêmè ndi dibìikà dyà ku lufù ne Mwoyi; Nêmmujuulè cyákàbidi.” Nènku pàdi Muludiki munène utuuluka ne utèèka dikombo adi pânshì, dîbà adi: “kakwàkwikala kàbidi cikondo to.” Pàdi Mwanjèlo awu, wa mu Bwàkabuulwibwà nshapità wa 10, ùtèèka dikàsà dimwè pa buloba bûme ne dikwàbò pa mbû, ne mwanzankongolo kumutù Kwèndè, Wàkadicipa ne: “kakwàkwikala kàbidi cikondo to.” Pààlwà cikondo aci,

nenùjuukè munkaci mwà bafwè. Apu mpiìkala bakwàbo abu bashààlemu, nwènù nenùbwele.

<sup>246</sup> Shààlaayi mu Dinwàngana dyà mijiki. Shààlaayi mu Dîyì dyà Nzambì. Nànscha byôbì biikàle bikolè bishi, shààla ànu naaDi, mwaba wônsò ùdì Nzambì utuuta awu.

<sup>247</sup> Misangu mikwàbo Yéyè ùtu ujuula ndululu bwà kukosa myonji, bwà kukushiya mudishikamine. Ùtu wenza nànkú. Wêwê udi wamba ne: “Èè, ncyêna mumanye cîndì mufwanyine kwenza to.” Yéyè mmumanye. Dishìllangana kaayi? Udi wêwê ànu—udi wêwê ànu unaya citùpà cyanàànà. Yéyè ki Udi mukukwàte mu cyanza Cyendè. Yéyè ngudi ukuludika.

<sup>248</sup> Vùlkààyì ne, byônsò mbyenza ku cimanyinu. Tudi tumòna mu cikondo citùdì ne mwoyi, ku cimanyinu citùdì tusanganyiibwamù, pa nànkú tudi bamanye cîdì Dinwàngana dyà mijiki dyenza leelu ewu. Ncikondo cyà kutapulula, kuumusha Bukénkè ku mîdimà.

<sup>249</sup> Tùcyämbààyì bônsò cyàpàmwè, bwà kanùlù kucipwaku mwoyi to, bwalu ndi ndyumvwa mwà kwamba nènku: “Ndyumusha dyà Bukénkè ku mîdimà.” Tùcyämbààyì cyàkàbidì ne: “Ndyumusha dyà Bukénkè ku mîdimà.”

<sup>250</sup> Ki Dinwàngana dyà mijiki dyà Nzambì adi’s. Ùdi ùcileeja mu maulu. Ùdi ùcileeja pa cibàsa cifiìke. Ùdi ùcileejila ku Yéyè mwine. Wâkacìlaya mu Dîyì. Tudi tucimòna cishindikiibwe. Ùdi ùtâpulula blé ne bisota. Ùdi ùmusha Bukénkè ku mîdimà.

<sup>251</sup> Nudi baMwitàbùùje, ne mwoyi wènù wônsò anyi? Nànkú, twîmbààyaakù musambu wètù mwîmpè awu.

<sup>252</sup> Nènku ndi muswè kwambila bampaasàtà dîyì, bwà katancì kakesè cyanàànà. Bânà bètù, Mukalenge ànùbènèshè. Twasàkidilaayi bwà ditangalaja dyà masangisha ènù ne dilwa naawu kaaba aka. Kunùdì nwènù bampaasàtà bâdi aku abu, ncyà bushùwà ne ndi nnwela twasàkidila. Ndi mwaba ewu ànu...

<sup>253</sup> Lekelaayi ngämbè, bânà bètù ne, nkufwànyineku kwikala ba-Méthodistes, ba-Baptistes, ba-Presbytériens. Nudi nuumvwa ne, ndi ngaakula ne beena Mpenta ànu byà mwomumwe ne muumvwa mwakule neenù anyi? Ànu mùshindù ùmwèùmwè awu, nwamònù’s. Kabyena...

<sup>254</sup> Mêmè ncìyi mwà kubenga kupetangana ne muntu pa bidiyè wàmба, ànu byètù byà menemene ebi, kadi mutungunuke ànu ne kumunanga... Bwalu, mêmè mupangilàngane nendè ku mèyì, ànu bwà kupangilangana nendè ku mèyì patupu, ndi mwena lubombo; ncyêna mwakanyine bwà kwimana mwab’ewu to. Kadi mêmè mupangilangane nendè ku mèyì bwà bwobùmwè ne dinanga ne dyumvwa, cidiye wenza nànscha ciikàle cinyi, yéyè udi ànu mwanèètù wa balùme wa mushinga mukolè. Ndi ntwa ku cyèndè. Èyowà, bushùwà menemene. Ncyà bushùwà menemene.

Piikala aci kaciyi munda mwà mwoyi wànyì to, dîbà adi Nzambì ànguumushe ku cyambilu eku, ncyêna mukumbanyine kwikala mwaba ewu to. Ncyà bushùwà. Ndi ncyàmba bwà dinanga, ne cintu kampànda cîndì mmòna cilwa. Ne Yêyè katukù mwanji kundekela bwà ngìlkale mutupakane pa bwalu abu to, too ne leelù ewu, bwalu citu ànu Dîyì Dyèndè misangu yônsò. Pa nànku, Nzambì ànùbènèshè.

<sup>255</sup> Mpindyewu twìnyikààyaaku mitù yètù ànu bwà katanci kakesé cyanàànà, bwà kwimba musambu mwîmpè, wa kale ewu utùtù twimba pa ciibidilu ewu, “Ndi muMunange, ndi muMunange.” Mwimbi wa pyànò, anyi ní nganyi udiku awu, anyi beena mijiki abu, bôbô mwà kutupéeshaku ndambu wa cyona cyàwù, ngeela meeji. Èyowà, èyo, twänjì tumonaayibi ní tudi mwà kuwìmba dîbà adi kakùyi mùjiki to. Bônsò cyàpàmwè mpindyewu, ne mitù yètù miinyika.

Ndi muMunange, ndi muMunange  
Bwalu Yêyè wakannanga kumpàlà  
Ne wakampetela lupàndu  
Pa mucì wà Kàlvariyò.

<sup>256</sup> Ngeela meeji ne mbiimànyike mikàbà yà mêtì mpindyewu. Nwamònou's, mukàbà wà mêtì ewu wùdi wuya kwônsò... 

*SHÀLOM* LUA64-0119  
(Shalom)

Diyiisha edi dya Mwaneetu William Branham dyakayiishiibwa bwa musangu wa kumpala mu Anglais mu dyàlumingu mu mapingaja, dyà matùkù 19 à ngondo wa cyongo, cidimu cyà 1964, ku Ramada Inn mu Phoenix, Arizona, U.S.A. Ndyumusha pa mukaba wa mèyi ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmuntuuta ku cyamu ne mwabanya kùdi Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyì dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lüntândalà, kulamiibwa mu cikàlwîlà, kukudimunyibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)